

北

史

九

蘇氏藏書

列傳第十三

北史二十五

古弼

張黎

劉潔

丘堆

娥清

伊馥

乙瓌

周幾

豆代田



車伊洛

王洛兒

車路頭

盧魯元

陳建

來大千

宿石

萬安國

周觀

尉撥

陸真

呂洛拔

薛彪子

子珣

尉元

慕容白曜

和其奴

苟頽

宇文福

古弼代人也少忠謹善騎射初爲獵郎門下奏事以敏正稱明元嘉其真而有用賜名曰筆後改名弼言其有輔佐

才也令典西部與劉潔等分綰機要數奏百揆太武即位  
以功拜立節將軍賜爵靈壽侯歷位侍中吏部尚書典南  
部奏事後征馮弘弘將奔高麗高麗救軍至弘乃隨之令  
婦人被甲居中其精卒及高麗陳兵於外弼部將高苟子  
擊賊軍弼酒醉拔刀止之故弘得東奔太武大怒黜爲廣  
夏門卒尋復爲侍中與尚書李順使涼州賜爵建興公鎮  
長安甚有威名及議征涼州弼與順咸言涼州乏水草不  
宜行帝不從旣剋姑臧微嫌之以其有將略弗之責宋將  
裴古明剋仇池立楊玄庶子保熾於是假弼節督隴右諸  
軍討仇池平之未幾諸氏復推楊文德爲主圍仇池弼攻

解其圍文德走漢川時東道將皮豹子聞仇池圍解議欲  
還軍弼使謂曰若其班師寇衆復至後舉爲難不出秋冬  
南寇必來以逸待勞百勝之策也豹子乃止太武聞之曰  
弼言長策也制有南秦弼謀多矣景穆摠攝萬機徵爲東  
宮四輔與宜都王穆壽竝參政事遷尚書令弼雖事務殷  
湊而讀書不輟端謹愼密口不言禁中事功名等於張黎  
而廉不及也上谷人上書言苑囿過度人無田業宜減太  
半以賜貧者弼入欲陳奏遇帝與給事中劉樹基志不聽  
事弼侍坐良久不獲申聞乃起於帝前捧樹頭掣下牀以  
手搏其耳以拳歐其背曰朝廷不理實尔之罪帝失容放

碁曰不聽奏事過在朕樹何罪置之弼具狀以聞帝竒弼  
公直皆可其奏以與百姓弼曰爲臣逞志於君前者非無  
罪也乃詣公車免冠徒跣自劾請罪帝召之謂曰卿其冠  
履吾聞築社之役蹇蹇而築之端冕而事之神與之福然  
則卿有何罪自今以後苟利社稷益國便人者雖復顛沛  
造次卿則爲之無所顧也太武大閱將校獵於河西弼留  
守詔以肥馬給騎人弼命給弱者太武大怒曰尖頭奴敢  
裁量朕也朕還臺先斬此奴弼頭尖帝常名之曰筆頭時  
人呼爲筆公屬官懼誅弼告之曰吾謂事君使田獵不過  
盤游其罪小也不備不虞使我寇忒逸其罪大也今北狄孔

熾南虜未滅狡焉之志窺伺邊境是吾憂也故選肥馬備  
軍實爲不虞之遠慮苟使國家有利吾寧避死乎明主可  
以理干此自吾罪帝聞而歎曰有臣如此國之寶也賜衣  
一襲馬二疋鹿十頭後車駕田於山北獲麋鹿數千頭詔  
尚書發車牛五十乘運之帝尋謂從者曰筆公必不與我  
汝輩不如馬運之速遂還行百餘里而弼表至曰今秋穀  
懸黃麻菽布野豬鹿竊食鳥鴈侵費風波所耗朝夕參倍  
乞賜矜緩使得收載帝謂左右曰筆公果如朕上可謂社  
稷之臣初楊難當之來也詔弼悉送其子弟於京師楊玄  
少子文德以黃金三十斤賂弼弼受金留文德而遇之無禮



文德亡入宋太武以其正直有戰功弗加罪責太武崩吳王立以弼爲司徒文成即位與張黎竝坐議不合旨俱免有怨謗之言其家人告巫蠱俱伏法時人冤之

張黎鴈門平原人也善書計道武知待之明元器其忠亮賜爵廣平公管綜機要太武以其功舊任以輔弼除大司農卿軍國大議黎常與焉以征赫連定功進號征北大將軍與樂安王範濟南公崔徽鎮長安清約公平甚著聲稱代下之日家無餘財太武征涼州蠕蠕吳提乘虛入寇黎與司空長孫道生拒擊走之景穆初摠百揆黎與崔浩等輔政忠於奉上非公事不言詔賜浩黎布帛各千疋以褒

舊勲吳王余立以黎爲太尉後文成即位與古弼俱誅

劉潔長樂信都人也昭成時慕容氏獻女潔祖父生爲公  
主家臣乃隨入魏賜以妻妾生子堤位樂陵太守封信都  
男卒潔襲堤爵數從征討進爵會稽公後與永安侯魏勤  
及功勞將軍元屈等擊吐京叛胡爲其所執送赫連屈丐  
潔聲氣不撓呼其字而與之言神色自若屈丐壯而釋之  
後得還國典東部事明元寢疾太武監國潔與古弼等選  
侍東宮對綜機要太武即位奇其有柱石用委以大任及  
議軍國朝臣咸推其能遷尚書令改爲鉅鹿公車駕西伐  
潔爲前鋒沮渠牧犍弟董來距戰於城南潔信卜者之言

以日辰不協擊鼓却陣故董來得入城太武微嫌之潔父  
 在樞密恃寵自專帝心稍不平時議伐蠕蠕潔言不如廣  
 農積穀以待其來羣臣皆從其議帝決行乃從崔浩議既  
 出與諸將期會鹿渾谷而潔恨其計不用欲沮諸將乃矯  
 詔更期諸將不至時虜衆大亂景穆欲擊之潔執不可停  
 鹿渾谷六日諸將猶不集賊已遠遁追至石水不及而還  
 師次漢中糧盡士卒多死潔陰使人驚軍勸帝棄軍輕還  
 帝不從潔以軍行無功奏歸罪於崔浩帝曰諸將後期及  
 賊不擊罪在諸將豈在於浩又潔矯事遂發輿駕至五原  
 收潔幽之太武之征也潔私謂親人曰若軍出無功車駕

不返即吾當立樂平王潔又使右丞張嵩求圖讖問劉氏  
應王繼國家後我審有名姓不嵩對曰有姓而無名窮驗  
款引搜嵩家果得讖書潔與南康公秋隣及嵩等皆夷三  
族死者百餘人潔既居勢要內外憚之側目而視籍其家  
財產鉅萬太武追忿言則切齒

丘堆代人也美容儀初以忠謹入侍明元即位拾遺左右  
稍遷散騎常侍太武監國臨朝堆與太尉穆觀等爲右弼  
及即位賜爵臨淮公位太僕與宗正娥清略地關右而宜  
城王奚斤表留堆合軍與赫連昌相拒斤進擊赫連定留  
堆守輜重斤爲定禽堆聞而棄甲走長安帝大怒遣西平

公安頡斬堆

娥清代人也少有將略累著戰功稍遷給事黃門侍郎明  
元南巡幸鄴以清爲中領軍將軍與宋兵將軍周幾等度  
河略地至湖陸以功賜爵須昌侯與幾等遂鎮枋頭太武  
初乃還京師進爲東平公後從平統萬遂與奚斤討赫連  
昌至安定及昌弟定西走斤追之清欲尋水往斤不從遂  
與斤俱爲定禽剋平涼乃得還後與古弼等東討馮弘以  
不急戰弘奔高麗檻車徵黜爲門卒而卒於家子延賜爵  
南平公

伊跋代人也少勇健走及奔馬善射力曳牛却行神麋初

擢爲侍郎轉三郎賜爵汾陽子太武將討涼州議者咸以  
無水草諫唯司徒崔浩勸行羣臣出後馱曰涼州若無水  
草何得爲國宜從浩言帝善之及剋涼州大會於姑臧帝  
謂羣臣曰崔公智計有餘吾亦不復竒之正竒馱弓馬士  
所見能與崔同耳顧謂浩曰馱智力如此終至公相浩曰  
何必讀書然後爲學衛青霍去病亦不讀書而致公輔帝  
欲以馱爲尚書封郡公馱以尚書務殷公爵至重辭之中  
祕二省多諸文士請參其次帝賢之遂拜祕書監賜爵河  
南公拜司空清約自守爲政舉大綱而已不爲竒碎大安  
二年領太子太保三年與司徒陸麗等竝平尚書事薨子

蘭襲爵位庫部尚書卒子益生驍勇有膽氣累有戰功遂  
爲名將以勲賜爵平城子爲西道都督戰歿贈雍州刺史  
乙瓌代人也其先世統部落太武時瓌父匹知遣瓌入貢  
帝留之瓌善騎射手格猛獸尚太武女上谷公主除駙馬  
都尉賜爵西平公從駕南征都督前鋒諸軍事勇冠三軍  
後進爵爲王又爲西道都將薨年二十九贈太尉公謚曰  
恭子乾歸襲爵乾歸有氣幹頗習書疏尤好兵法尚景穆  
女安樂公主除駙馬都尉侍中獻文初爲秦州刺史有惠  
政孝文即位爲中道都將卒謚曰康子海字懷仁位散騎  
侍郎卒謚曰孝海子瑗字雅珍尚孝文女淮陽公主除駙

馬都尉累遷西兗州刺史天平元年舉兵應樊子鵠戰敗死

周幾代人也少以善射爲獵郎明元即位爲左部尚書以軍功封交趾侯太武以幾有智勇遣鎮河南威信著于外境幾常嫌奚斤等綏撫關中失和每至言論形于聲色斤等憚焉進號宋兵將軍率洛州刺史于栗磾以萬人襲陝城卒于軍軍人無不歎惜之歸葬京師謚曰桓子步襲爵且代田代人也明元時以善騎射爲內細射從攻武牢詔代田登樓射賊矢不虛發以功遷內三郎從討赫連昌乘勝追賊入其宮門門閉代田踰宮而出太武壯之拜勇武



將軍後從討平涼破赫連定得奚斤等以定妻賜之詔斤  
膝行授酒於代田敕斤曰全尔身命者代田功也以從討和  
龍戰功封長廣公卒於統萬鎮大將贈長廣王謚曰恭子  
周求襲爵

車伊洛焉耆胡也世爲東境部落帥恒脩職貢延和中授  
平西將軍封前部王伊洛規欲歸闕爲沮渠無諱斷路伊  
洛連戰破之無諱卒伊洛前後遣使招喻其子乾壽等及  
其戶五百餘家送之京師又率部衆二千餘人伐高昌討  
破焉耆東關七城正平二年伊洛朝京師拜都官尚書將  
軍王如故卒謚康王葬禮依盧魯元故事子歇襲爵

王洛兒京兆人也明元在東宮以善騎射給事帳下謹愿  
未嘗有過明元嘗獵于灋南水陷沒馬洛兒投水奉帝出  
殆將凍死帝解衣賜之自是恩寵日隆天賜末帝避難居  
外洛兒晨夜侍衛恭勤發於至誠元紹之逆帝左右唯洛  
兒與車路頭晝居山嶺夜還洛兒家洛兒隣人李道潛相  
奉給晨復還山衆庶頗知喜而相告紹聞收道斬之洛兒  
猶冒難往返京都通問於大臣大臣遂出奉迎百姓奔赴  
明元還宮社稷獲全洛兒有功焉明元即位拜散騎常侍  
賜爵新息公加直意將軍又追贈其父爲列侯賜僮隸五  
十戶卒贈太尉建平王賜溫明祕器載以輜輶車使殿中

衛士爲之導從親臨哀慟者四馬乃鳩其妻周氏與合葬  
子長城襲爵

車路頭代人也少以忠厚選給東宮爲帳下帥天賜末明  
元出於外路頭隨侍竭力及即位封宣城公忠意將軍帝  
性明察羣臣多以職事遇譴至有杖罰故路頭優游不任  
事性無害每評獄處理常獻寬恕之議以此見重於朝帝  
亦敬納之卒明元親臨哀慟贈太保宣城王諡曰忠貞喪  
禮一依安城王叔孫俊故事陪葬金陵子眷襲爵

盧魯元昌黎徒河人也曾祖副鳩仕慕容氏爲尚書令臨  
澤公祖父竝至大官魯元寬和有雅度明元時選爲通直

郎以忠謹給侍東宮太武親愛之即位以爲中書侍郎寵待彌渥而魯元益加謹肅帝愈親待之内外大臣莫不敬憚性多容納善與人交好掩人過揚人美由是公卿咸親附之以工書有文才累遷中書監領祕書事賜爵襄城公贈其父爲信都侯從征赫連昌太武親追擊入其城門魯元隨帝出入是日微魯元幾至危殆後遷太保錄尚書事帝貴異之臨幸其第不出旬日欲其居近易往來乃賜甲第於宮門南衣食車馬皆乘輿之副真君三年駕幸陰山魯元以疾不從侍臣問疾醫藥傳驛相屬於路及薨帝甚悼惜之還臨其喪哭之哀慟東西二宮命太官日送奠晨

昏哭臨訖則備奏鍾鼓伎樂輿駕比葬三臨之喪禮依安城王叔孫俊故事而贈送有加贈襄城王謚曰孝葬於嶧山爲建碑闕自魏興貴臣恩寵無與爲比子統襲爵以父任侍東宮太武以元舅陽平王杜超女南安長公主所生妻之車駕親自臨送太官設供具賞賚千計文成即位典選部主客二曹卒贈襄城王謚曰景無子弟彌娥襲卒贈襄城王謚曰恭魯元少子內給侍東宮景穆深昵之常與臥起同衣食父子有寵兩宮勢傾天下內性寬厚有父風而恭慎不及正平初宮臣伏誅太武以魯元故唯殺內而厚撫其兄弟

陳建代人也以善騎射擢爲三郎遷下大夫內行長太武  
討山胡白龍輕之單將騎數十每自登山白龍伏壯士出  
不意帝墜馬幾至不測建以身捍賊奮擊殺數人被十餘  
瘡帝壯之賜別戶二十文成初出爲幽州刺史假秦郡公  
帝以建貪暴懦弱遣使就州罰杖五十孝文初徵爲尚書  
右僕射加侍中進爵趙郡公建與晉陽侯元仙德長樂王  
穆亮平原王陸叡密表啓南伐帝嘉之遷司徒進爵魏郡  
王帝與文明太后頻幸建第賜建妻於後庭薨子念生襲  
有罪爵除

來大千代人也父初真從道武避難叱候山參翔業功官

至後將軍武原侯與在八議大干驍果善騎射永興初襲爵位中散至於朝賀之日大干常著御鎧盤馬殿庭朝臣莫不嗟歎遷內三郎幢將典宿衛禁旅大干用法嚴明上下齊肅嘗從明元校獵見獸在高巖上持稍直前刺之應手而死帝嘉其勇壯太武踐阼與襄城公盧魯元等七人俱爲常侍常持仗侍衛晝夜不離左右累從征伐以戰功賜爵廬陵公鎮雲中兼統白道軍事太武以其壯勇數有戰功兼悉北境險要詔使巡撫六鎮以防寇虜經略布置甚得事宜後吐京胡反以大干爲都將討平之在吐京卒喪還停於平城南太武出游還見而問之左右以對帝悼

歎者良久詔聽其喪入殯城內贈司空謚莊公子丘頽襲爵降爲晉興侯

宿石朔方人赫連屈丐弟文陳之曾孫也天興中文陳父子歸魏道武嘉之以宗女妻焉拜上將軍祖若豆根明元時賜姓宿氏襲上將軍父沓干從太武征平涼有功賜爵漢安男後從討蠕蠕戰沒石年十三襲爵擢爲中散遷內行令從於苑中游獵石走馬引前道峻馬倒殞絕久之乃蘇由是御馬得制文成嘉之賜以綿帛駿馬改爵義陽子又常從獵文成親欲射猛獸石叩馬諫引帝至高原上後猛獸騰躍殺人褒美其忠許後有犯罪宥而勿坐賜駿馬



一疋尚上谷公主拜駙馬都尉位吏部尚書進爵太山公  
爲北征中道都大將卒追贈太原王謚康穆禮依盧曹元  
故事太和初子倪襲爵

萬安國代人也世爲酋帥父振尚高陽長公主拜駙馬都  
尉位長安鎮將爵馮翊公安國少明敏以國甥復尚河南  
公主拜駙馬都尉獻文特親寵之與同卧起拜大司馬大  
將軍封安城王安國先與神部長奚買奴不平承明初矯  
詔殺買奴於苑中孝文聞之大怒遂賜死年二十三子翼  
襲主爵有嵇根者世爲紇奚部帥皇始初率部歸魏尚昭  
成女生子拔位尚書令拔尚華陰公主生子敬元紹之逆

也主有功超授敬大司馬封長樂王薨子護龍襲拜外都大  
官根事迹遺落故略附云

周觀代人也驍勇有膂力太武以軍功賜爵金城公位高  
平鎮將善撫士卒號有威名後拜內都大官出爲秦州刺  
史撫馭失和部人薛永宗聚衆汾曲以叛觀討永宗爲流  
矢所中太武幸蒲坂觀聞帝至驚怖而起瘡重遂卒帝怒  
絕其爵云

尉撥代人也父斛濮陽太守撥爲太學生募從兗州刺史  
羅士擊賊於陳汝有功賜爵介休男討和龍擊吐谷渾皆  
有軍功進爵爲子累遷杏城鎮將大得人和文成以撥清

平有惠績賜以衣服獻文即位為北征都將南攻懸瓠進  
爵安城侯位北豫州刺史卒諡敬侯

陸真代人也父洛侯秦州刺史真少善騎射太武以真膂  
力過人拜內三郎真君中從討蠕蠕以功賜爵關內侯後  
攻懸瓠登樓臨射城中弦不虛發從太武至江還次盱台  
真功居多文成即位進爵都昌侯位選部尚書後拜長安  
鎮將時初置長蛇鎮真率衆築城未訖而氏豪仇僕檀等  
反叛真擊平之卒城長蛇而還東平王道符反于長安以  
真為長安鎮將賜爵河南公長安平兵人素伏其威信及  
至皆帖然安靜在鎮數年甚著威稱卒諡曰烈子延字契

胡提頗有氣幹襲爵河南公例降改封汝陽侯位懷朔鎮大將太僕卿受使綏慰秀容爲牧子所害

呂洛拔代人也曾祖渴侯昭成時率戶五千歸魏父匹知太武時爲西部長封榮陽公洛拔以壯勇知名文成末爲平原鎮都將隨尉元攻宋將張永大敗之賜爵成武侯卒長子文祖獻文以其勲臣子補龍牧曹奏事中散以牧產不滋坐徙武川鎮後文祖以舊語譯註皇詔辭義通辯爲外都曹奏事中散後坐事伏法

薛彪子代人也祖達頭自姚萇時率部落歸魏道武賜爵聊城侯待以上客禮賜妻鄭氏卒贈冀州刺史諡曰悼父

野睹并太二州刺史封河東公有聲稱卒諡曰簡彪子姿  
貌壯偉明斷有父風爲內行長典奏諸曹事當官正直內  
外憚之及文明太后臨朝出爲枋頭鎮將素剛簡爲近臣  
所嫉因小過黜爲鎮門士及獻文南巡次山陽彪子拜訴  
於路復除枋頭鎮將累遷開府徐州刺史在州甚多惠政  
百姓便之沛郡太守邵安下邳太守張攀咸以賊汙彪子  
案之於法安等遣子弟上書誣彪子南通賊虜孝文曰此  
妄矣推案果虛卒諡曰文子琬

琬字曇珍形貌瓌偉少以幹用爲典客令每引見儀望甚  
美宣武謂曰卿風度峻整姿貌秀異後當升進何以處官

琬答曰宗廟之禮不敢不敬朝廷之事不敢不忠自此之外非庸臣所及正光中行洛陽令部內肅然時以久旱京師見囚悉召集於都亭理問冤滯洛陽獄唯有三人孝明嘉之賜縑百疋琬本附元又又廢憂懼由是政教廢弛坐免官李神軌有寵於靈太后琬復事之累遷吏部郎中先是吏部尚書崔亮奏立停年格不簡人才專問勞舊琬乃上書曰臣聞錦穀雖輕不委之以學割瑚璉任重豈寄之以弱力若使選曹唯取年勞不簡賢否使義均行鴈次若貫魚勘簿呼名一吏足矣數人而用何謂銓衡今黎元之命繫於守長若其得人則蘇息有地任非其器爲患更深

請郡縣之職吏部先盡擇才并學通古今曉達政職者以應其選不拘入職遠近年勲多少其積勞之中有才堪牧人者自在先用之限其餘不堪者既壯藉其力豈容老而棄之將佐丞尉去人稍遠小小當否未爲多失宜依次補叙以酬其勞書奏不報後因引見復陳之曰今四方初定務在養人臣請依漢氏更立四科令三公宰貴各薦時賢以補郡縣明立條格防其阿黨之端庶令塗炭之餘戴仰有地詔下公卿議之事亦寢元天穆討邢杲以琚爲行臺尚書軍次東郡時元顥已據鄆城邢杲又逼歷下天穆議其所先議者咸以杲盛宜先經略唯琚以杲爲聚衆無名

雖強猶賊元顥皇室昭親來稱義舉自河陰之役人情駭  
怨今有際會易生感動待顥事決然後迴師天穆以羣情  
所願遂先討杲杲降軍還至定陶天穆留琬行西兗州事  
尋爲元顥所陷顥執琬自隨介朱榮破顥天穆謂琬曰不  
用君言乃至於此天平初拜七兵尚書齊神武引爲丞相  
府長史軍國之事多所關知琬亦推誠盡節屢進忠讜神  
武大舉西伐將度蒲津琬諫曰西賊連年饑饉故冒死來  
入陝州但宜置兵諸道勿與野戰比及來年麥秋人應餓  
死寶炬黑獺自然歸降願無渡河侯景亦曰今舉兵極大  
萬不一捷卒難收斂不如分爲二軍相繼而進前軍若勝



後軍令方前軍若敗後軍承之神武皆弗納遂有沙苑之敗後范陽盧仲禮反瑒與諸軍討平之轉殷州刺史爲政嚴酷吏人苦之後歷位度支殿中二尚書天保元年卒於兼尚書右僕射臨終敕其子殷以時服踰月便葬不聽干求贈官自制喪車不加彫飾但用麻爲旒蘇繩綱絡而已明器等物竝不令置瑒久在省闈明閑簿領當官剖斷敏速如流然天性險忌情義不篤外若方格內實浮動受納貨賄曲理舞法深文刻薄多所傷害人士畏惡之魏東平王元匡妾張氏淫逸放恣瑒初與姦通後納以爲婦惑其讒言遂棄前妻于氏不認其子允家人內忿競相告列深

爲世所譏鄙贈開府儀同三司尚書左僕射青州刺史諡曰威恭子允嗣

尉元字苟仁代人也世爲豪宗父目斤勇略聞於當時位中山太守元以善射稱爲羽林中郎以匪懈見知稍遷駕部給事中賜爵富城男和平中遷北部尚書進爵太昌侯天安元年薛安都以徐州內附獻文以元爲持節都督東道諸軍事與城陽公孔伯恭赴之宋兗州刺史畢衆敬遣東平太守章仇檟歸款元竝納之遂長驅而進宋遣將張永沈攸之等屯于下碯安都出城見元元依朝旨授其徐州刺史遣中書侍郎高閭李璿等與安都俱還入城別令

孔伯恭撫安內外然後元入彭城元以求仍據險要乃命  
安都與璨等同守身率精銳揚兵於外分擊呂梁絕其糧  
運永遂捐城夜遁於是遣高閭與張謨對爲東徐州刺史  
李璨與畢衆敬對爲東兗州刺史拜元開府都督徐州刺  
史淮陽公太和初徵爲內都大官旣而出爲使持節鎮西  
大將軍開府統萬鎮都將甚得夷人之心三年進爵淮陽  
王以舊老見禮聽乘步挽杖於朝齊高帝旣立多遣間諜  
扇動新人不逞之徒所在蜂起以元威名夙振使摠率諸  
軍以討之東南清晏遠近帖然入爲侍中都曹尚書遷尚  
書令進位司徒十年例降庶姓王爵封山陽郡公其年頻

表以老乞身詔許之元詣闕謝老引見於庭命升殿勞宴  
賜玄冠素服又詔曰前司徒山陽郡公尉元前大鴻臚卿  
新太伯游明根竝元亨利貞明允誠素位顯台宿歸老私  
第可謂知始知卒希世之賢也公以八十之年宜處三老  
之重卿以七十之齡可充五更之選於是養三老五更於  
明堂國老庶老於階下孝文再拜三老親袒割牲執爵而  
饋於五更行肅拜之禮賜國老庶老衣服有差旣而元言  
曰自天地分判五行施則人之所崇莫重於孝順然五孝  
六順天下之所先願陛下重之以化四方臣旣年衰不究  
遠趣心耳所及敢不盡誠帝曰孝順之道天地之經今承

三老明言銘之于懷明根言曰夫至孝通靈至順感幽故詩云孝悌之至通於神明光于四海如此則孝順之道無所不格願陛下念之以濟黎庶臣等志朽弊識見昧然在於愚慮不敢不盡帝曰五更助三老以言至範敷展德音當尅已復禮以行來授禮畢乃賜步挽一乘詔曰夫尊老尚更列聖同致欽年敬德綿哲齊軌朕雖道謝玄風識昧叡則然仰稟先誨企遵猷旨故推老以德立更以元父焉斯彰兄焉斯顯矣前司徒公元前鴻臚卿明根並以汁德懸車懿量歸老故尊老以三事更以五雖老更非官耄臺罔祿然況事既高宜加殊養三老可給上公祿五更可食

元卿俸供食之味亦同其例十七年元疾篤帝親省疾薨  
謚景桓公葬以殊禮給羽葆鼓吹假黃鉞班劍四十人子  
翊龍襲爵遷洛以山陽在畿內改爲博陵郡公卒於恒州刺  
史謚曰順

慕容白曜慕容皝之玄孫也父瑒歷官以廉清著稱賜爵  
高都侯終尚書左丞謚曰簡白曜少爲中書吏以敦直給  
事宮中襲爵稍遷北部尚書文成崩與乙渾共執朝政遷  
尚書右僕射進爵南鄉公宋徐州刺史薛安都兗州刺史  
畢衆敬竝以城內附詔鎮南大將軍尉元鎮東將軍孔伯  
恭赴之而宋東平太守申纂屯無鹽并州刺史房崇吉屯

斗城逼絕王使皇興初加白曜使持節督諸軍事征南大將軍進爵上黨公屯碣磔爲諸軍後繼白曜攻纂於無鹽拔其東郭纂遁遣兵追執之迴攻斗城肥城戍主聞軍至棄城遁走獲粟三十萬石又下襲破麋溝垣苗二戍得粟十餘萬斛由是軍糧充足先是淮陽公皮豹子再征垣苗不剋白曜旬內頻拔四城威震齊土獻文下詔褒美之斗城不降白曜縱兵陵城殺數百人崇吉夜遁白曜撫其入百姓懷之獲崇吉母妻待之以禮宋遣將奚喜公欲寇彭城鎮南大將軍尉元請濟師獻文詔白曜赴之白曜到瑕丘遇患因停會崇吉與從弟法壽盜宋盤陽城以贖母

妻白曜遣將軍長孫觀等率騎入自馬耳關赴之觀至盤陽諸縣悉降白曜自瑕丘進攻歷城二年崔道固及兗州刺史梁鄒守將劉休賓並面縛而降白曜皆釋之送道固休賓及其寮屬于京師後乃徙二城人望於下館朝廷置平齊郡懷寧歸安二縣以居之自餘悉爲奴婢分賜百官白曜雖在軍旅而接待人物寬和有禮所獲崇吉母妻申纂婦女皆別營安置不令士卒喧雜及進克東陽擒沈文秀凡獲倉粟八十五萬斛始末三年築圍攻擊雖士卒死傷無多怨叛三齊欣然安堵樂業剋城之日以沈文秀抗倨不爲之拜忿而撾撻唯以此見譏以功拜開府儀同三



司都督青州刺史進爵濟南王初乙渾專權白曜頗所挾  
附後緣此追以爲責四年見誅云謀反叛時論寃之白曜  
少子真安年十一聞父被執將自殺家人止之曰輕重未  
可知真安曰王位高功重若小罪終不至此我不忍見父  
之死遂自縊太和中著作佐郎成淹上表理白曜孝文覽  
表嘉愍之白曜弟子契輕薄無檢太和初以名家子擢爲  
中散遷宰官中散南安王楨有貪暴之響遣中散閭文祖  
詣長安察之文祖受楨金寶之賂爲楨隱而不言事發太  
后引見羣臣謂曰前論貪清皆云剋脩文祖時亦在中後  
竟犯法以此言之人心信不可知孝文曰卿等自審不勝

貪心者聽辭位歸第契進曰小人之心無定而帝王之法  
有常以無怕之心奉有常之法非所克堪乞垂退免帝曰  
契若知心不可常即知貪之惡矣何爲求退遷宰官令賜  
爵定陶男後卒於都督朔州刺史諡曰克初慕容氏破後  
種族仍繁天賜末頗忌而誅之時有免者不敢復姓皆以  
興爲氏延昌末詔復舊姓而其子女先入掖庭者猶號慕  
容特多於他族

和其奴代人也少有操行善射御初爲三郎文成初封平  
昌公累遷尚書左僕射又與河東王閭毗太宰常英等並  
平尚書事在官慎法不受私請遷司空加侍中文成崩乙

渾與林金閭擅殺尚書楊保年等時殿中尚書元郁率殿中宿衛士欲加兵於渾渾懼歸各於金閭執以付郁時其奴以金閭罪惡未分出之爲定州刺史皇興元年長安鎮將東平王道符反詔其奴討之未至而道符敗軍還薨內外歎惜之贈平昌王諡曰宣子受襲爵

苟頽代人也本姓若干父洛拔內行長頽厚重寡言少嚴毅清真武力過人擢爲中散小心謹敬太武至江賜爵建德男累遷司衛監洛州刺史抑強扶弱山嶽畏威不敢爲寇太和中歷位侍中都曹尚書進爵河南公頽方正好直言雖文明太后生殺不允頽亦言至懇切李惠李訢之誅

顏竝致諫遷司空進爵河東王以舊老聽乘步挽杖於朝  
大駕行幸三川顏留守京師沙門法秀謀反顏率禁旅收  
掩畢獲內外晏然薨諡僖王長子愷襲爵河東王例降爲  
公

宇文福其先南單于之遠屬也世爲擁部大人祖活撥仕  
慕容垂爲唐郡內史遼東公道武之平慕容氏活撥入魏  
爲第一客福少驍果有膂力太和中累遷都牧給事及遷  
洛敕福檢牧馬所福規石濟以西河內以東拒黃河南北  
千里爲牧地今之馬場是也及徙代移雜畜牧於其所福  
善於將養竝無損耗孝文嘉之尋補司衛監後以勲封襄

樂縣男歷位太僕卿都官尚書營州大中正瀛州刺史性  
忠清在公嚴毅以信御人甚得聲譽後除都督懷朔沃野  
武川三鎮諸軍事懷朔鎮將至鎮卒諡曰貞惠子延字慶  
壽體貌魁岸眉目踈朗位負外散騎侍郎以父老詔聽隨  
侍在瀛州屬大乗祆黨突入州城延率奴客逆戰身被重  
瘡賊縱火燒齋閣福時在內延突火入抱福出外支體灼  
爛鬢髮盡焦於是勒衆與賊苦戰賊乃散走以此見耨累  
遷直寢與乃俟醜奴戰沒

論曰古弼軍謀經國有柱石之量張黎誠謹廉方以勲舊  
見重並纖介之間一朝隕覆有及十世乃徒言耳劉潔答

之徒也丘堆敗以亡身娥清伊馘俱以材力見用而馘以  
謀猷取異其殆優乎乙瓌之驍猛周幾之智勇代田之騎  
射其位遇豈徒然也車伊洛宅心自遠豈常戎乎王洛兒  
車路頭盧曹元陳建來大千宿石或誠發于衷竭節危難  
或忠存衛主義足感人苟非志烈亦何能若此宜其生受  
恩遇歿盡哀榮至如安國以至覆亡害盈之義也周觀尉  
撥陸眞呂洛拔等咸以勇毅自進而觀竟致貶黜異夫數  
子者矣薛彪子世載強正曇珍克盛家聲美矣乎魏之諸  
將罕方面之績尉元以寬雅之風膺將帥之任威名遠被  
位極公老自致乞言之地無乃近代之一人歟白曜出專

薄伐席卷三齊考績圖勞固不細矣而功名難處追猜嬰戮有賢議勤未聞於斯日也和其奴之真正苟賴之剛直宇文福之氣幹咸亦有用之士乎

列傳第十三

北史二十五

列傳第十四

北史二十六

宋隱

從子愔  
弟于世良

愔孫弁  
世軌

弁孫欽道  
翻弟世景

弁族弟翻

許彥

五世孫傳

刁靡

子遵

曾孫冲

辛紹先

韋閼

孫子粲

杜銓

宋隱字處默西河介休人也曾祖顓祖活父恭世仕慕容氏位並通顯慕容儁徙鄴恭始家於廣平列人焉隱性至孝專精好學仕慕容垂位本州別駕道武平中山拜隱尚



書吏部郎積遷行臺右丞領選以老病乞骸骨不許尋以  
母喪歸列人既葬被徵乃棄妻子匿於長樂數年而卒臨  
終謂其子經曰汝等苟能入順父兄出悌鄉黨仕郡幸而  
至功曹史以忠清奉之足矣不勞遠詣臺閣恐汝不能富  
貴徒延門戶累耳若忘吾言是死若父也使鬼有知吾不  
歸食矣隱弟宣字道茂與范陽盧玄勅海高允傳陵崔建  
從子悆俱被徵拜中書博士後拜侍郎行司徒校尉卒諡  
曰簡侯宣子謨字乾仁襲爵卒於遼西太守子鸞襲爵位  
東莞太守鸞弟瓊字普賢以孝稱母冒病季秋月思瓜瓊  
夢想見之求而遂獲時人異之卒於家悆歷中書博士貞

外散騎常侍使江南爵列人子卒於廣平太守長子顯襲爵顯無子養弟子弁爲後

弁字義和父叔珍娶趙郡李敷妹因敷事而死弁至京師見尚書李冲因言論移日冲異之退曰此人一日千里王佐才也顯卒弁襲爵弁與李彪州里迭相祗好彪爲祕書丞請爲著作佐郎遷尚書殿中郎中孝文嘗因朝會次歷訪政道弁年少官微自下而對聲姿清亮進止可觀帝稱善者久之因是大被知遇賜名爲弁意取弁和獻王楚王不知寶之也遷中書侍郎兼負外散騎常侍使齊齊司徒蕭子良祕書丞王融等皆稱美之以爲志氣謇諤不逮李

彪而體韻和雅舉止閑邃過之轉散騎侍郎時散騎位在中書之右孝文曾論江左事問弁在南興亡之數弁以爲蕭氏父子無大功於天下旣以逆取不能順守必不能貽厥孫謀保有南海若物憚其威身免爲幸後車駕南征以弁爲司徒司馬東道副將軍人有盜馬韉者斬而徇於是三軍震懼莫敢犯法黃門郎崔光薦弁自代帝不許亦賞光知人未幾以弁兼司徒左長史時大選內外羣官弁定四海士族弁專參銓量之任事多稱旨然好言人之陰短高門大族意所不便者弁因毀之至於舊族淪滯而人非可忘者又申達之弁又爲本州大中正姓族多所降抑頗

爲時人所怨遷散騎常侍尋遷右衛將軍領黃門并屢自  
陳讓帝曰吾爲相知者卿亦不可有辭豈得專守一官不  
助朕爲政且常侍者黃門之庶兄領軍者三衛之假攝不  
足空存推讓以棄大委其被知遇如此孝文北都之選李  
冲多所參預頗抑宋氏并恨冲而與李彪交結雅相知重  
及彪之抗冲冲謂彪曰爾如狗耳爲人所嫉及冲劾彪不  
至大罪并之力也彪除名并大相嗟慨密圖申復孝文在  
汝南不豫大漸旬餘日不見侍臣左右唯彭城王勰等數  
人而已小瘳乃引見門下及宗室長幼諸人入者未能皆  
致悲泣惟并與司徒司馬張海歔歔流涕由是益重之車

駕征馬圈留弁以本官兼祠部尚書攝七兵事及行執其  
手曰國之大事在祀與戎故令卿綰攝二曹弁頓首辭謝  
弁劬勞王事恩遇亞於李冲帝每稱弁可爲吏部尚書及  
崩遺詔以弁爲之與咸陽王禧等六人輔政而弁先卒年  
三十八贈瀛州刺史諡曰貞順弁性好矜伐自許膏腴孝  
文以郭祚晉魏名門從容謂弁曰卿固當推郭祚之門弁  
笑曰臣家未肯推祚帝曰卿自漢魏以來旣無高官又無  
雋秀何得不推弁曰臣清素自立要爾不推侍臣出後帝  
謂彭城王勰曰弁人身自不惡乃復欲以門戶自矜殊爲  
可怪長子維字伯緒襲父爵爲給事中坐諂事高肇出爲

益州龍驤府長史辭疾不行太尉清河王懌輔政以維名  
臣子薦爲通直郎辟其弟紀行參軍靈太后臨政委任元  
叉恃寵僭盈懌每以公理裁斷又甚忿恨思害懌遂與維  
作計以富貴許之維見叉寵勢日隆乃告司決都尉韓文  
殊父子謀逆立懌懌被錄禁中文殊父子懼而逃遁鞠無  
反狀以文殊亡走懸處大辟置懌於宮西別館禁兵守之  
維應反坐叉言於太后欲開將來告者之路乃黜爲燕州  
昌平郡守紀爲秦州大羌令維及紀頗涉經史而浮薄無  
行懌尊親懿望朝野瞻屬維受懌眷賞而無狀構間天下  
士人莫不怪忿而賤薄之及叉殺懌專斷朝政以維兄弟

前者告懌徵維爲散騎侍郎紀爲太學博士領侍御史又甚昵之維超遷通直常侍又除洛州刺史紀超遷尚書郎紀字仲烈初并謂族弟世景言維踈險而紀識慧不足終必敗吾業世景以爲不爾至是果然聞者以爲知子莫若父尚書令李崇左僕射郭祚右僕射游肇每云伯緒凶踈終敗宋氏幸得殺身耳論者以爲有徵後除營州刺史靈太后反政以又黨除名遂還鄉里尋追其前誣告清河王事於鄴賜死子春卿早亡弟紀以次子欽仁嗣欽仁武定末爲太尉祭酒紀明帝末爲北道行臺卒晉陽子欽道欽道仕齊歷位中山太守長於撫接然好察細事其州府

佐吏使人間者先酬錢然後敢食臨莅處稱爲嚴整尋徵爲黃門侍郎又令在東宮教太子吏事時鄭子默以文學見知亦被親寵欽道本文法更不甚諳識古今凡有疑事必詢子默二人幸於兩宮雖諸王貴臣莫敢不敬憚欽道又遷祕書監仍帶黃門侍郎乾明初遷侍中與楊愔同誅贈吏部尚書趙州刺史并族弟穎字文賢位魏郡太守納貨劉騰騰言之以爲涼州刺史穎前妻劉氏亡後十五年穎夢見之拜曰新婦今被剋分爲高崇妻故來辭君泣然涕流穎曰見崇言之崇後數日而卒穎族弟鴻貴爲定州北平府參軍送戍兵於荊州坐取兵絹四百匹兵欲告之



乃斬兵十人又疏凡不達見令律有梟首罪乃生斷兵手以水澆之然後斬決尋坐伏法時人哀兵之苦笑馮貴之愚弁族弟翻

翻字飛鳥少有操行世人以剛斷許之孝莊時除司徒左長史河南尹初翻爲河陰令順陽公主家奴爲劫攝而不送翻將兵圍主宅執主壻馮穆步驅向縣時正炎暑立之日中流汗霑地縣舊有大柳時人號曰彌尾青及翻爲縣主吏請焚之翻曰置南牆下以待豪右未幾有內監楊小駒詣縣請事辭色不遜翻命取尾青以鎖之小駒旣免入訴於宣武宣武大怒敕河南尹推之翻具自陳狀詔曰卿

故違朝法豈不欲作威以買名翻對曰造者非臣買名者亦宜非臣所以留者非敢施於百姓欲待凶暴之徒如駒者耳於是威振京師及爲洛陽迄於河南尹畏憚權勢更相承接故當世之名大致減損卒官贈侍中衛將軍相州刺史孝武初重贈驃騎大將軍儀同三司尚書左僕射雍州刺史諡曰貞烈翻弟毓字道和敦篤有志行卒於太中大夫子世良

世良字元友年十五便有膽氣後隨伯父翻在南兖州屢有戰功行臺臨淮王彧與語奇之魏朝以尔朱榮有不臣跡帝將圖之密令彧將兵赴洛彧在梁郡稱疾假世良都

督令還南兗發兵以聽期卅良請簡見兵三千騎五日必到洛陽并陳三策賊皆不能從尋爲殷中侍御史詣河北括戶大獲浮情還見汲郡城旁多骸骨移書州郡悉令收瘞其夜甘雨滂沱河內太守田估贓貨百萬卅良檢按之未竟遇赦而還孝莊勞之曰知卿所括得十倍於本帳若官人皆如此用心便是更出一天下也其後遷殷中卅良奏殷中主齊會之事請改付餘曹帝曰卿意不欲親庖厨邪宜付右兵以爲永式河州刺史梁景歡抱罕羌首恃遠不敬其賀正使人頻年稱疾秦州刺史侯莫陳悅受其贈遺常爲送表卅良竝奏科其罪帝嘉之謂長孫永業曰宋

郎中實有家風甚可重也後拜清河太守世良才識閑明  
尤善政術在郡未幾聲問甚高陽平郡移掩劫盜三十餘  
人世良訊其情狀唯送十二人餘皆放之陽平太守魏明  
朗大怒云輒放吾賊及推問送者皆實放者皆非明朗大  
服郡東南有曲堤成公一姓阻而居之羣盜多萃於此人  
爲之語曰寧度東吳會稽不歷成公曲堤世良施八條之  
制盜奔他境人又謠曰曲堤雖險賊何益但有宋公自屏  
跡齊天保初大赦郡無一囚率羣吏拜詔而已獄內穠生  
桃樹蓬蒿亦滿每日牙門虛寂無復訴訟者謂之神門其  
冬醴泉出於界內及代至傾城祖道有老人丁金剛者泣

而前謝曰老人年九十記三十五政府君非唯善政清亦  
徹底今失賢者人何以濟莫不攀轅涕泣後卒於東郡太  
守贈信州刺史世良強學好屬文撰字略五篇宋氏別錄  
十卷子伯宗位侍御史性清退好學多所撰述至齊亡不  
徙職遂不入仕隋大業初卒於家世良弟世軌

世軌幼自脩整好法律天保初歷三尚書三公二千石都  
官郎中兼并州長史執獄寬平多所全濟爲都官郎中有  
囚事枉將送垂致法世軌遣騎追止之切奏其狀遂免稍  
遷廷尉少卿洛州人聚結欲劫河橋吏捕案之連諸元徒  
黨千七百人崔昂爲廷尉以爲反數年不斷及世軌爲少

卿判其事為劫唯殺魁首餘從坐悉舍焉大理正蘇珍之以平幹知名寺中語曰決定嫌疑蘇珍之視表見裏宋世軌時人以為寺中二絕南臺囚到廷尉世軌多雪之仍移攝御史將問其濫狀中尉畢義雲不送移往復不止世軌遂上書極言義雲酷擅文宣引見二人親敕世軌曰我知臺欺寺久卿能執理抗衡但守此心勿慮不富貴敕義雲曰卿比所為誠合死以志在疾惡故且一恕仍顧謂朝臣曰此二人竝我骨鯁臣也及卒廷尉御史諸繫囚皆哭曰宋廷尉死我等豈有生路贈光州刺史諡曰平無子世良以第五子朝基嗣翻弟世景

世景少自脩立事親以孝聞與弟道璵下帷讀誦博覽群言尤精經義族兄弁甚重之舉秀才上第再遷彭城王勰開府法曹行參軍勰愛其才學雅相器敬孝文甚嘉異之遷司徒法曹行參軍世景明刑理著律令裁決疑獄剖判如流轉尚書祠部郎彭城王勰每稱曰宋世景精微尚書僕射才也臺中疑事右僕射游肇常以委之世景旣才長從政加之夙勤不怠兼領數曹深著稱績左僕射源懷引爲行臺郎巡察州鎮十有餘所黜陟賞罰莫不咸允遷七鎮別置諸戍明設亭候以備不虞懷大相委重還薦之宣武以爲不減李冲帝曰朕亦聞之後爲伏波將軍行滎陽

太守鄭氏豪橫號爲難制濟州刺史鄭尚弟遠慶先爲苑  
陵令多所受納百姓患之而世景下車召而誡之遠慶行  
意自若世景繩之以法遠慶懼棄官亡走於是屬縣畏威  
莫不改肅終日坐於聽事未嘗寢息人間之事巨細必知  
發姦擿伏有若神明嘗有一吏休滿還郡食人鷄豚又有  
一幹受人一帽又食二鷄世景叱而告之吏幹叩頭伏罪  
於是上下震悚莫敢犯禁坐第道璵事除名世景友于之  
性過絕於人及道璵死哭之酸感行路歲餘母喪遂不勝  
哀而卒世景曾撰晉書竟未得就遺腹子李儒位太學博  
士曾至譙宋間爲文弔嵇康甚有理致後夜寢室壞墜而



殞時人悼傷惜之道璵少而敏俊自太學博士轉京兆王  
愉法曹行參軍坐愉反得罪作詩及挽歌詞寄之朋親以  
見冤痛道璵又曾贈著作郎張始均詩其末章云子深懷  
璧憂余有當門病道璵既不免難始均亦遇世禍時咸怪  
之道璵從孫孝王學涉亦好緝綴文藻形貌姪陋而好臧  
否人物時論甚疾之爲北平王文學求入文林館不遂因  
非毀朝士撰朝士別錄二十卷會周武滅齊改爲關東風  
俗傳更廣聞見勒成三十卷以上之言多妄謬篇第冗雜  
無著述體周大象末預尉迴事誅死

許彥字道謨高陽新城人也祖茂仕慕容氏高陽太守彥

少孤貧好讀書從沙門法叡受易太武徵令卜筮頻驗遂  
在左右參與謀議彥質厚慎密與人言不及內事帝以此  
益親待之賜爵武昌公拜相州刺史在州受納多違法度  
詔書切讓之然以彥腹心近臣弗之罪也卒諡宣公子熙  
襲熙卒子安仁襲安仁卒子元康襲降爵爲侯熙弟宗之  
歷位殷中尚書定州刺史封潁川公受敕討丁零旣平宗  
之因循郡縣求取不節深澤人馬超毀謗宗之宗之怒歐  
殺超超家人告狀宗之上超謗訕朝政文成聞之曰此必  
宗之懼罪誣超案驗果然遂斬於都市元康弟護州主簿  
子恂字伯禮頗有業尚閨門雍睦三世同居吏部尚書李

神雋常稱其家風位司徒諮議參軍脩起居注拜太中大夫卒贈吏部尚書冀州刺史伯惇

惇字季良清識敏速達於從政位司徒主簿以明斷見知時人號爲鐵主簿稍遷陽平太守時遷都於鄴陽平爲畿郡軍國責辦賦斂無準又勲貴屬請朝夕徵求惇竝御之以道咸以無怨政爲天下第一特加賞異圖形於闕詔頒天下歷魏尹齊梁二州刺史政竝有治聲遷大司農會王思政入據潁城王師出討惇常督軍無乏絕引洧水灌城惇之策也遷殿中尚書惇美鬚下垂至帶省中號長鬚公齊文宣嘗因酒酣提惇鬚稱美以刀截之唯留一握惇

懼因不復敢長人又號齊鬚公歷御史中丞膠州刺史司  
農大理二卿再爲度支尚書太子少保少師光祿大夫開  
府儀同三司尚書右僕射特進賜爵万年縣子食邑下邳  
郡幹惇年老致仕於家三年卒惇少純直晚更浮動齊朝  
體式本州大中正以京官爲之乾明中邢邵爲中書監德  
望甚高惇與邵競中正遂憑附宋欽道出邵爲刺史朝議  
甚鄙薄之雖久處朝行歷官清顯與邢邵魏收陽休之崔  
劼徐之才比肩同列諸人或談說經史或吟詠詩賦更相  
嘲戲欣笑滿堂惇不好劇談又無學術或坐杜口或隱几  
而睡不爲勝流所重子文紀武平末度支郎中文紀第文

經勤學方雅身無擇行口無戲言武平末殿中侍御史隋  
開皇初侍御史兼通直散騎常侍聘陳使副主爵侍郎卒  
於相州長史惇兄遜字仲讓有幹局乾明中平原太守卒  
贈信州刺史遜子文高司徒掾

刁離字淑和勃海饒安人也曾祖協從晉元帝度江居京  
口位尚書令父暢晉右衛將軍初晉相劉裕微時負社錢  
二万違時不還暢兄逵執而徵焉及誅桓玄以嫌先誅刁  
氏離與暢故吏遂奔姚興爲太子中庶子及姚泓滅與司  
馬休之等歸魏請於南境自効明元假離建威將軍離遂  
於河濟間招集流散傳檄邊境離弟彌時亦率衆入京口

親共討裕裕頻遣兵破之明元南幸鄴離朝於行宮明元  
問曰縛劉裕者於卿親踈離曰伯父帝笑曰劉裕父子當  
應憚卿於是假離鎮東將軍青州刺史東光侯使別立義  
軍又詔離令隨機立効離於是招集譙梁彭沛人五千餘  
家置二十七營遷鎮濟陰遷徐州刺史賜爵東安伯後除  
薄骨律鎮將離以西土之雨表求鑿渠溉公私田又奉詔  
以高平安定統萬及薄骨律等四鎮出車牛五千乘運屯  
穀五十萬斛付沃野以供軍糧道多深沙車牛艱阻求於  
牽屯山河水之次造船水運又以所綰邊表常懼不虞造  
城儲穀置兵備守詔皆從之詔即名此城爲刁公城以旌

功焉皇興中薨與隴西王源賀及中書監高允等竝以耆  
年特見優禮錫薨几杖劍履上殿月致珍羞焉薨性寬柔  
好尚文典手不釋書明敏多智凡所爲詩賦論頌并諸雜  
文百有餘篇又汎施愛士恬靜寡欲篤信佛道著教誡二  
十餘篇以訓子孫太和八年卒年九十五謚曰簡子遵  
遵字奉國襲爵遵少不拘小節長更脩改太和中例降爲  
侯嘗經篤疾幾死見有神明救之言福門子當享長年後  
卒於洛州刺史謚曰惠侯子楷早卒楷子冲

冲字文朗十三而孤孝慕過人其祖母司空高允女聰明  
婦人也哀其早孤撫養尤篤冲免喪後便志學他方高氏

泣涕留之冲終不止雖家世貴達及從師於外自同諸生  
于時學制諸生悉日直監厨冲雖有僕隸不令代己身自  
炊爨每師受之際發志精專不捨晝夜殆忘寒暑學通諸  
經偏脩鄭說陰陽圖緯筭數天文風氣之書莫不閑綜當  
世服其精博刺史郭祚聞其盛名訪以疑義冲應機解辯  
無不祛其疑惑後太守范陽盧尚之刺史河東裴桓並徵  
冲爲功曹主簿非所好也受署而已不閑事務唯以講學  
爲心四方學徒就其受業者歲有數百冲雖儒生而執心  
壯烈不畏強禦延昌中帝舅司徒高肇擅恣威權冲乃抗  
表極言其事辭旨懇直文義忠憤太傳清河王懌覽而歎



息先是冲曾祖離作行孝論以誠子孫稱古之葬者衣之以薪不封不樹後世聖人易之以棺槨至秦以後生則不能致養死則厚葬過度及於末世至遽蔭裹尸裸而葬者確而爲論竝非折衷既知二者之失豈宜同之當令所存者棺厚不過三寸高不過三尺費用繒綵歛以時服輜車止用白布爲幔不加畫飾名爲清素車又去挽歌方相并明器雜物及冲祖遵將卒敕其子孫令奉離遺旨河南尹丞張普惠謂爲太儉貽書於冲叔整令與通學議之冲乃致書國學諸儒以論其事學官竟不能荅神龜末冲以嫡傳祖爵東安侯京兆王繼爲司空也竝以高選頻辟記室

參軍明帝將親釋奠於是國子助教韓神固與諸儒詣國  
子祭酒崔光吏部尚書甄琛舉其才學奏而徵焉及卒國  
子博士高涼及范陽盧道休盧景裕等復上狀陳冲業行  
議奏諡曰安憲先生祭以太牢子欽字志儒早亡楷弟整  
字景智少有大度頗涉書史太和十五年爲奉朝請孝文  
都洛親自臨選除司空法曹參軍累遷黃門郎普泰初假  
征東大將軍滄冀瀛三州刺史大都督尋加車騎將軍右  
光祿大夫遂逢本鄉賊亂奉母客於齊州旣而母卒母即  
高允之女崔光崔亮皆經允接待是以涼燠之際光等每  
致拜焉天平四年卒於鄴贈司空公諡曰文獻整解音律

輕財好施交結名勝聲酒自娛然貪而好色爲議者所貶  
子柔

柔字子溫少好學留心儀禮性強記至於氏族內外皆所  
諳悉居母喪以孝聞初爲魏宣武挽郎解巾司空行參軍  
齊天保初累遷國子博士中書令魏收撰魏史啓柔等同  
其事柔性專固自是所聞收常嫌憚又參議律令時議者  
以爲五等爵邑承襲無嫡子立嫡孫無嫡孫立嫡子弟無  
嫡子弟立嫡孫弟柔以爲無嫡孫應立嫡曾孫不應立嫡  
子弟議曰案禮立嫡以長故謂長子爲嫡子嫡子死以嫡  
子之子爲嫡孫死則曾玄亦然然則嫡子之名本爲傳重

故喪服曰庶子不爲長子三年不繼祖與禰也禮公儀仲子之喪檀弓曰我未之前聞也仲子舍其孫而立其子何也子服伯子曰仲子亦猶行古之道也昔者文王舍伯邑考而立武王發微子舍其孫臚而立其弟紂鄭注曰仲子爲親者諱耳立子非也文王之立武王權也微子嫡子死立弟衍殷禮也子游問諸孔子孔子曰不立孫注商以嫡子死立嫡子之母弟周以嫡子死立嫡子之子爲嫡孫故春秋公羊之義嫡子有孫而死質家親親先立弟文家尊尊先立孫喪服云爲父後者爲出母無服小記云祖父卒而後爲祖母後者三年爲母無服喪者不祭故也爲祖母

三年者大宗傳重故也今議以嫡孫死而立嫡子母弟嫡子母弟者則爲父後矣嫡子母弟本非承嫡以無嫡故得爲父後則嫡孫之弟理亦應得爲父後則是父卒然後爲祖後者服斬既得爲祖服斬而不得爲傳重末之聞也若用商家親親之義本不應舍嫡子而立嫡孫若從周家尊尊之文豈宜舍其孫而立其弟或文或質愚用惑焉小記云嫡婦爲舅姑後者則舅姑爲之小功注云謂夫有廢疾他故若死無子不受重者小功庶婦之服凡父母於子舅姑於婦將不傳重於嫡及將所傳重者非嫡服之皆如衆子庶婦也言死無子者謂絕世無子非謂無嫡子如其子

焉得云無後夫雖廢疾無子婦猶以嫡爲名嫡名旣在而欲廢其子者如禮何有損益革代相必謂宗嫡可得而變者則爲後服斬亦宜有因而改七年卒柔在史館未久勒成之際志在偏黨魏書中與其內外通親者竝虛美過實爲時論所譏整弟宣字季達以功封高城縣侯歷位都官尚書衛大將軍滄州刺史卒贈太尉公諡曰武刀氏世有榮貴而門風不甚脩潔爲時所鄙雍族孫雙字子山高祖數召齊郡太守數因晉亂居青州之安樂至雙始歸本鄉雙少好學兼涉文史雅爲中山王英所知賞位西河太守爲政清簡吏人安悅及中山王熙起兵誅元叉事敗熙

第略投命於雙雙藏護周年時購略甚切略懼求送出境  
雙曰會有一死所難遇耳今遭知己視死如歸願不以爲  
慮略復苦求南轉雙乃遣從子昌送達江左靈太后反政  
知略因雙獲濟徵拜光祿大夫時略姊饒安主刀宣妻也  
頻訴靈太后乞徵略還朝廷乃以徐州所獲俘江革祖昉  
二人易之以雙與略有舊乃令至境迎接明帝末除西兗  
州刺史時賊盜蜂起州人張挑弓等招聚亡命公行劫掠  
雙至境先遣使諭挑弓陳示禍福挑弓即隨使歸罪雙捨  
而不問後有盜發之剽令挑弓追捕咸悉禽獲於是州境  
清肅孝莊初行濟州刺史以功封曲城鄉男孝武初遷驍

騎大將軍左光祿大夫興和三年卒贈車騎大將軍儀同  
三司齊州刺史諡曰清穆

辛紹先隴西狄道人也五世祖怡晉幽州刺史父深仕西  
涼爲驍騎將軍及涼後主歆與沮渠蒙遜戰於蓼泉軍敗  
失馬深以所乘授歆而身死於難以義烈見稱西土涼州  
平紹先內徙家於晉陽明敏有識量與廣平游明根范陽  
盧度世同郡李承昭等甚相友有至性丁父憂三年口不  
甘味頭不擲沐髮遂落盡故常著垂裙皂帽自中書博士  
轉神部令皇興中薛安都以彭城歸魏時朝廷欲綏安初  
附以紹先爲下邳太守爲政不甚皦察舉其大綱而已唯



教人爲產禦賊之備及宋將陳顯達蕭道成蕭順之來寇道成謂順之曰辛紹先未易侵也宜共慎之於是不歷郡境徑屯呂梁卒於郡贈并州刺史晉陽侯諡曰惠子鳳達耽道樂古有長者之名卒於京兆王子推國常侍鳳達子祥字萬福舉司州秀才再遷司空主簿咸陽王禧妃即祥妻之妹也及禧構逆親知多罹塵謗祥獨蕭然不預轉并州平北府司馬有白壁還兵藥道顯被誣爲賊官屬咸疑之祥曰道顯面有悲色察獄以色其此之謂乎苦執申之月餘別獲真賊後除郢州龍驤府長史帶義陽太守白早生之反也梁遣來援因此緣淮鎮戍相繼降沒唯祥堅城

固守梁又遣將胡武城陶平虜於州南金山之上連營侵逼祥出其不意襲之賊大崩禽平虜斬武城以送京師州境獲全論功方有賞授而刺史婁悅恥勲出其下間之執政事竟不行胡賊劉龍駒作逆華州除祥安定王燮征虜府長史仍爲別將與討胡使薛和滅之卒贈南青州刺史祥弟少雍字季和少聰穎有孝行尤爲祖父紹先所愛紹先性嗜羊肝常呼少雍共食及紹先卒少雍終身不食肝性仁厚有禮義門內之法爲時所重稍遷司空高陽王雍田曹參軍少雍清正不憚強禦積年久訟造次決之請託路絕時稱賢明正始中詔百官各舉所知高陽王雍及吏

部郎中李憲俱以少雍爲舉首卒於給事中少雍妻王氏有德義少雍與從弟懷仁兄弟同居懷仁等事之甚謹閨門禮讓人無間焉士大夫以此稱美子元桓武定中儀同府司馬元桓弟士遜太師開府功曹參軍鳳達弟穆字叔宗舉茂才東雍州別駕初隨父在下邳與彭城陳敬文友善敬文弟敬武少爲沙門從師遠學經久不返敬文病臨卒以雜綾二十匹託穆與敬武穆久不得見經二十年始於洛陽見敬武以物還之封題如故世稱廉信歷東荊州司馬轉長史帶義陽太守領戍雅有恤人之志再轉汝陽太守遇水滂人饑上表請輕租賦帝從之遂救汝陽一郡

聽以小綃爲調除平原相徵爲征虜將軍太中大夫未發卒於郡贈後將軍幽州刺史子子馥字元穎早有學行累遷平原相父子竝爲此郡吏人懷安之元顥入洛子馥不從莊帝反政封三門縣男天平中除太尉府司馬白山連接三齊瑕丘數州之界多有賊盜子馥受使檢覆因辯山谷要害宜立鎮戍之所又諸州豪右在山鼓鑄姦黨多依之又得密造兵仗上表請破罷諸冶朝廷善而從之後卒於清河太守子馥以三傳經同說異遂總爲一部傳注竝出校比短長會亡未就

韋閼字友觀京兆杜陵人也卅爲三輔冠族祖楷晉長樂

清河二郡太守父達慕容垂天長秋卿閭少有器望遇慕容氏政亂避地薊城太武初徵拜咸陽太守轉武都太守卒郡子範試守華山郡賜爵高平男卒範子雋字穎超早有學少孤事祖母以孝聞性溫和廉讓爲州里所稱太和中襲爵歷位都水使者宣武崩領軍于忠矯擅威刑雋與左僕射郭祚昏嫁故亦同時遇害臨終訴枉於尚書元欽欽知而不敢申理雋歎曰吾一生爲善未蒙善報常不爲惡今爲惡終悠悠蒼天抱直無訴時人咸怨傷焉熙平元年追贈洛州刺史諡曰貞子子燦

子燦字暉茂齊王蕭寶夤爲雍州刺史引爲府主簿轉錄

事參軍及寶貴反子榮與弟子爽執志不從相率逃免雍  
州平賜爵長安子普泰中累遷中書侍郎孝武帝入關子  
榮歷行臺左丞南汾州刺史少弟道諧爲鎮城都督元象  
中齊神武命將出討子榮及道諧俱被獲送於晉陽子榮  
累遷南充州刺史齊天保初封西隸縣男後卒於豫州刺  
史諡曰忠子榮兄弟十三人並有孝行居父喪毀瘠過禮  
旣葬廬於墓側負土成墳弟榮亮最知名榮亮字子昱博  
學有文才德行仁孝爲時所重歷諫議大夫衛大將軍卒  
贈河州刺史子綱字世紀有操行才學見稱領袖本州調  
爲中正開皇中位趙州長史有子文宗文闕並知名闔從

叔道福父罷爲符堅丞相王猛所器重以女妻焉仕堅爲東海太守堅滅奔江左仕宋爲秦州刺史道福有志略仕宋位盱眙南沛二郡太守領鎮北府錄事參軍與徐州刺史薛安都謀擁州內附賜爵高密侯因家彭城卒贈兖州刺史諡曰簡子欣宗以歸國勲別賜爵杜縣侯歷位太中大夫行幽州事卒贈南兖州刺史諡曰簡閔從子崇字洪基父肅字道壽隨劉義真度江位豫州刺史崇年十歲父卒母鄭氏攜以入魏因寓居河洛少爲舅兖州刺史鄭義所器賞位司徒從事中郎孝文納其女爲充華嬪除南潁川太守不好發擿細事恒云何用小察以傷大道吏人感

之郡中大安帝聞而嘉賞賜帛二百匹遷洛以崇爲司州  
中正尋除咸陽王禧開府從事中郎復爲河南邑中正崇  
頻居衡品以平直見稱出爲鄉郡太守更滿應代吏人詣  
闕乞留復延三年後卒子猷之釋褐奉朝請轉給事中步  
兵校尉稍遷前後將軍太中大夫卒猷之弟休之貞和自  
守未嘗言行忤物歷位給事中河南邑中正安西將軍光  
祿大夫卒子道建道儒閭族弟珍字靈智孝文賜名焉父  
子尚字文叔位樂安王良安西府從事中郎卒贈雍州刺  
史珍少有志操歷位尚書南部郎孝文初蠻首桓誕歸款  
朝廷思安邊之略以誕爲東荊州刺史令珍爲使與誕招



慰蠻左珍至桐栢山窮淮源宣揚恩澤莫不懷附淮源舊  
有祠堂蠻俚恒用人祭之珍乃曉告曰天地明靈即人之  
父母豈有父母甘子肉味自今宜悉以酒脯代用羣蠻從  
約自此而改凡所招降七萬餘戶置郡縣而還以奉使稱  
旨賜爵霸城子後以軍功進爵爲侯累遷顯武將軍郢州  
刺史所在有聲績朝廷嘉之遷龍驤將軍賜驂騑二匹帛  
五十匹穀三百斛珍乃召集州內孤貧者謂曰天子謂我  
能撫綏卿等故賜以穀帛吾何敢獨當遂以所賜悉分與  
之尋轉荊州刺史與尚書盧陽烏征赭陽爲齊將垣歷生  
蔡道恭所敗免歸鄉里臨別謂陽烏曰主上聖明志吞吳

會用兵機要在於上流若有事荆楚恐老夫復不得停耳  
後車駕征鄧沔復起珍爲中軍大將軍彭城王勰長史鄧  
沔旣平試守魯陽郡孝文復南伐路經珍郡加中壘將軍  
正太守珍從至清水帝曰朕頃戎車再駕卿恒翼務中軍  
今日之舉亦欲引卿同行但三鵠嶮要非卿無以守也因  
敕還及孝文崩於行宮祕匿而還至珍郡始發大諱還除  
中散大夫尋加鎮遠將軍太尉諮議參軍卒贈本將軍青  
州刺史諡曰懿長子績字遵彥年十三補中書學生聰敏  
明辯爲博士李彪所稱再遷侍御中散孝文每與德學沙  
門談論往復績掌綴錄無所遺漏頗見知賞累遷長兼尚

書左丞壽春內附尚書令王肅出鎮揚州請續行爲州長  
史加平遠將軍帶梁郡太守肅薨敕續行州事任城王澄  
代肅爲州復啓續爲長史澄出征之後梁將姜慶眞乘虛  
攻襲遂據外郭雖尋克復續坐免官卒續弟彧字遵慶亦  
有學識解褐奉朝請稍遷平遠將軍東豫州刺史綏懷蠻  
左頗得其心蠻酋田益宗子魯生魯賢先叛父南入數爲  
寇掠自彧至州魯生等咸戕啓脩敬不復爲害彧以蠻俗  
不識禮儀乃立大學選諸郡生徒於州總教又於城北置  
崇武館以習武焉州境清肅罷還遇大將軍京兆王繼西  
征請爲長史尋以本官兼尚書爲幽夏行臺以功封陰盤

縣男卒贈撫軍將軍雍州刺史諡曰文子彪龍孝莊末爲  
藍田太守因仕關西彪弟融以軍功賜爵長安伯稍遷大  
司馬開府司馬融娶司農卿趙郡李瑾女疑其妻與章武  
王景哲姦通乃刺殺之懼亦自殺弟肱字遵顯少有志業  
年十八辟州主簿時屬歲儉肱以家粟造粥以飼飢人所  
活甚衆解褐太學博士稍遷右軍將軍爲荆郢和羅大使  
南郢州刺史田夷啓稱肱父珍往往任荊州恩洽夷夏乞肱  
充南道別將領荊州驍勇共爲腹背詔從之未幾行南荆  
州事遷東徐州刺史梁遣其郢州刺史田麤禧率衆來寇  
肱於石羊岡破斬之以功封杜縣子卒於侍中雍州刺史

諡曰宣長子鴻字道衍頗有幹用累遷中書舍人天平三年坐漏泄賜死於家

杜銓字士衡京兆人晉征南將軍預五世孫也祖胄苻堅太尉長史父疑慕容垂祕書監仍僑居趙郡銓學涉有長者風與盧玄高允等同被徵爲中書博士初密太后父豹喪在濮陽太武欲令迎葬於鄴謂司徒崔浩曰天下諸杜何處望高朕今方改葬外祖意欲取杜中長老一人以爲宗正令營護凶事浩曰京兆爲美中書博士杜銓其家今在趙郡是杜預後於今爲諸杜最密召見銓器貌瓌雅太武感悅謂浩曰此真吾所欲也以爲宗正令與杜超子道

生送豹喪柩致葬鄴南銓遂與超如親超謂銓曰既是宗  
近何緣僑居趙郡乃延引同屬魏郡再遷中書侍郎賜爵  
新豐侯卒贈相州刺史魏縣侯謚曰宣子振字李元舉秀  
才卒於中書博士振子遇字慶期位尚書起部郎竊官材  
瓦起立私宅清論鄙之卒於河東太守贈都官尚書豫州  
刺史謚曰惠銓族孫景字宜明學通經史州府交辟不就  
景子裕字慶延雖官非貴仕而文學相傳仕齊位止樂陵  
令齊亡退居教授終于家子正玄字知禮少傳家業耽志  
經史隋開皇十五年舉秀才試策高第曹司以策過左僕  
射楊素怒曰周孔更生尚不得爲秀才刺史何忽妄舉此

人可附下考乃以策抵地不視時海內唯正玄一人應秀才餘常貢者隨例銓注訖正玄獨不得進止曹司以選期將盡重以啓素素志在試退正玄乃手題使擬司馬相如上林賦王褒聖主得賢臣頌班固燕然山銘張載劔閣銘白鸚鵡賦曰我不能爲君住宿可至未時令就正玄及時竝了素讀數徧大驚曰誠好秀才命曹司錄奏屬吏部選期已過注色令還期年重集素謂曹司曰秀才杜正玄至又試官人有奇器關竝立成文不加點素大嗟之命吏部優叙曹司以擬長寧王記室參軍時素情背曹官及見曰小王不盡其才也晉王廣方鎮揚州妙選府寮乃以正玄

爲晉王府參軍後豫章王鎮揚州又爲豫章王記室卒正  
玄弟正藏字爲善亦好學善屬文開皇十六年舉秀才時  
蘇威監選試擬賈誼過秦論及尚書湯誓匠人箴連理樹  
賦几賦弓銘應時竝就又無點竄時射策甲第者合奏曹  
司難爲別奏抑爲乙科正藏訴屈威怒改爲景第授純州  
行參軍遷梁郡下邑縣正大業中與劉炫同以學業該通  
應詔被舉時正藏弟正儀貢充進士正倫爲秀才兄弟三  
人同時應命當世嗟美之著作郎王劼奏追脩史司穀大  
夫薛道衡奏擬從事竝以見任且放還九年從駕征遼爲  
夫餘道行軍長史還至涿郡卒正藏爲文迅速有如宿構



曾令數人竝執紙筆各題一文正藏口授俱成皆有文理  
為當時所異又為文軌二十卷論為文體則甚有條貫後  
生寶而行之多資以解褐大行於世謂之杜家新書云

論曰宋隱操行貞白遺略榮名宣愔竝保退素咸見徵辟  
可謂德門者矣義和以才度見知迹參顧命拔萃出類當  
有以哉無子之歎豈徒羊舌宗祀不亡蓋其幸也翻剛鯁  
自立猛而斷務世良昆季雅有家風道謨卜筮取達季良  
累於學淺刀雕才識恢遠著聲立事禮遇優隆世有人爵  
堂構之義也辛韋不殞門風杜銓所在為重正玄難兄難  
弟信為美哉

列傳第十四

北史二十六

方洽周益周之冕孫粹然校正





列傳第十五

北史二十七

屈遵

張蒲

谷渾曾孫楷

公孫表

張濟

李先

賈彝

竇瑾

李訢

韓延之

袁式

毛脩之

嚴陵朱脩之

唐和

寇讚

孫儁

酈範

子道元

韓秀

堯暄

孫雄

柳崇

屈遵字子度昌黎徒何人也博學多才藝慕容垂以爲博

陸令道武南伐博陵太守申永南奔河外高陽太守崔宏  
東走海濱屬城長吏率多逃竄遵獨歸道武道武素聞其  
名拜中書令中原旣平賜爵下蔡子卒子須襲爵除長樂  
太守進爵信都侯卒贈昌黎公諡曰恭須長子恒字長生  
沈粹有局量歷位尚書右僕射加侍中以破平涼功賜爵  
濟北公太武委以大政車駕出征常居中留鎮與襄城公  
盧叢元俱賜甲第眞君四年墜馬卒時帝幸陰山景穆遣  
使乘傳奏狀帝甚悼惜之謂使人曰汝等殺朕良臣何用  
乘馬遂令步歸贈征西大將軍諡曰成公子道賜襲爵道  
賜善騎射機辯有辭氣太武甚器之位尚書右僕射加侍

中卒謚曰哀公子拔襲爵帝追思其父祖年十四以爲南部大人時太武南伐禽守將胡盛之以付拔酒醉不覺盛之逃太武令斬之將伏鎖帝愴然曰若鬼有知長生問其子孫朕將何以應乃赦拔後獻文以其功臣子拜營州刺史

張蒲字玄則河內脩武人也本名謨父攀仕慕容垂位兵部尚書以清方稱蒲少有父風仕慕容寶爲尚書左丞道武定中山寶官司叙用多降品秩帝旣素聞蒲名仍拜尚書左丞明元即位爲內都大官賜爵泰昌子參決庶獄私謁不行後改爲壽張子太武即位以蒲清貧妻子衣食不

給乃以爲相州刺史扶弱抑彊進善黜惡風化大行卒於  
官吏人痛惜之蒲在謀臣之列屢出爲將朝廷論之常以  
爲稱首贈平東將軍廣平公諡曰文恭子昭襲以軍功進  
爵脩武侯位幽州刺史以善政見稱

谷渾字元冲昌黎人也父衮彎弓三百斤勇冠一時仕慕  
容垂位廣武將軍渾少有父風任俠好氣晚乃折節授經  
業被服類儒者道武時以善隸書爲內侍左右太武時累  
遷侍中儀曹尚書賜爵濮陽公渾正直有操行性不苟合  
然愛重舊故不以富貴驕人時人以此稱之在官廉直爲  
太武所器重以渾子孫年十五以上悉補中書學生卒諡



曰文宣子闡字崇基襲爵位外都大官卒謚曰簡公子洪  
字元孫位尚書賜爵滎陽公性貪奢僕妾衣服錦綺時獻  
文舅李峻等初至官給衣服洪輒截沒爲有司所糾并窮  
其前後贓罪伏法子穎位太府少卿卒贈營州刺史謚曰  
貞子士恢字紹達位鴻臚少卿封元城縣侯太后嬖幸鄭  
儼懼紹達間構於帝因言次以紹達爲州紹達耽寵不願  
出太后誣其罪殺之渾魯孫楷楷有幹局稍遷奉車都尉  
眇一目性甚嚴忍前後奉使皆以酷暴爲名時人號曰瞎  
武累遷城門校尉卒

公孫表字玄元燕郡廣陽人也爲慕容沖尚書郎慕容垂

破長子從入中山慕容寶走乃歸為博士初道武以慕容垂諸子分據勢要權柄推移遂至亡滅表詣闕上韓非書二十卷道武稱善明元初賜爵固安子河西飢胡劉武反於上黨詔表討之為胡所敗帝深銜之太常七年宋武帝殂時議取河南侵地以奚斤為都督以表為吳兵將軍廣州刺史表既剋滑臺遂圍武牢車騎次汲郡始昌子蘇坦太史令王亮奏表置軍武牢東不得形便之地故令賊不時滅明元雅好術數又積前忿及攻武牢士卒多傷乃使人夜就帳中縊殺之以賊未退祕而不宣初表與勃海封愷友善後為子求愷從女愷不許表甚銜之及封氏為司

馬國璠所逮帝以舊族欲原之表證其罪乃誅封氏表外  
和內忌時人以此薄之表本與王亮同營署及其出也輕  
侮亮故及於死第二子軌字元慶明元時爲中書郎出從  
征討補諸軍司馬太武平赫連昌引諸將帥入其府藏各  
令任意取金玉諸將取之盈懷軌獨不取帝把手親探金  
賜之謂曰卿臨財廉朕所以增賜者欲顯廉於衆人後兼  
大鴻臚持節拜立氏楊玄爲南秦王及境玄不郊迎軌數  
玄無蕃臣禮玄懼詣郊受命使還稱旨拜尚書賜爵燕郡  
公出爲武牢鎮將初太武將北征發驢以運糧使軌部調  
雍州軌令驢主皆加絹一匹乃與受之百姓語曰驢無彊

弱輔脊自壯衆共嗤之坐徵還卒軌旣死帝謂崔浩曰吾  
過上黨父老皆曰公孫軌爲將受貨縱賊使至今餘姦不  
除軌之罪也其初來單馬執鞭及去從車百兩載物而南  
丁零渠帥棄山罵軌軌怒取罵軌者之母以矛刺其陰而  
死之曰何以生此逆子從下到劈分磔四支於山樹上是  
忍行不忍之事軌幸而早死至今在者吾必族誅之軌終  
得娶封氏生子叡字叔文位儀曹長賜爵陽平公時獻文  
於苑內立殿敕中祕羣官制名叡奏曰臣聞至尊至貴莫  
崇於帝王天人挹損莫大於謙光臣愚以爲宜曰崇光奏  
可卒於南部尚書謚曰宣叡妻崔浩弟女也生子良字遵

伯聰明好學爲尚書左丞爲孝文所知遇良弟衡字道津  
良推爵讓之仕至司直良以別功賜爵昌平子子崇基襲  
軌弟質字元直有經義爲中書學生稍遷博士太武征涼  
州留宜都王穆壽輔景穆時蠕蠕乘虛犯塞京師震恐壽  
雅信任質爲謀主質性好卜筮卜筮者咸云必不來故不  
設備由質幾敗國後屢進讜言超遷尚書卒贈廣陽侯謚  
曰恭第二子邃字文慶位南部尚書封襄平伯出爲青州  
刺史以邃在公遺迹可紀下詔褒述卒官孝文在鄴官爲  
之舉哀時百度唯新青州佐吏疑爲邃服詔曰專古也理  
與今違專今也太乖曩義當斟酌兩途商量得失人吏之

情亦不可苟順也主簿云近代相承服斬過葬便可如故  
自餘無服大成寥落可準諸境內之人爲齊衰三月子同  
始襲爵卒於給事中遂叡爲從父兄弟叡才器小優又封  
氏之男崔氏之壻遂母鴈門李氏地望縣隔鉅鹿太守祖  
季真多識北方人物每云士大夫當須好婚親二公孫同  
堂兄弟耳吉凶會集便有士庶之異

張濟字士度西河人也父千秋慕容永驍騎將軍永滅來  
奔道武善之拜建節將軍賜爵成紀侯濟涉獵書傳清辯  
善儀容道武愛之與公孫表等俱爲行人拜散騎侍郎襲  
爵先是晉雍州刺史楊佺期乞師於常山王遵以禦姚興

帝遣濟爲遵從事即報之濟自襄陽還帝問濟江南事濟  
曰司馬昌明死子德宗代立君弱臣彊全無綱紀佺期問  
臣魏初伐中山幾十萬衆臣答四十餘万佺期曰魏被甲  
戎馬可有幾匹臣答中軍精騎十餘万外軍無數佺期曰  
以此討羌豈不滅也又曰魏定中山徙幾戶於北臣答七  
万餘家佺期曰都城臣答都平城佺期曰有此大衆何  
用城爲又曰魏帝欲爲少都平城將移也臣答非所知也  
佺期聞朝廷不都山東貌有喜色曰洛城救援仰恃於魏  
若獲保全當必厚報如爲羌所棄寧使魏取道武嘉其辭  
厚賞其使許救洛陽後以累使稱旨拜勝兵將軍卒子多

羅龍爵坐事除

李先字容仁中山盧奴人少好學善占相術慕容永迎爲謀主勸永據長子城仕永位祕書監永滅徙中山皇始初先於井陘歸道武問先曰卿何國人祖父及身悉歷何官先曰臣本趙郡平棘人大父重晉平陽太守大將軍右司馬父懋石季龍樂安太守左中郎將臣苻丕左主客郎慕容永祕書監高密侯車駕還代以先爲尚書右中兵郎再遷博士定州大中正帝問先何者最善可以益人神智先曰唯有經書三皇五帝政化之典可以補王者神智又問朕欲集天下書籍如何對曰主之所好集亦不難帝於是



班制天下經籍稍集太武討姚興於柴壁也問計於先對  
曰兵以正合戰以奇勝聞姚興欲屯兵天渡利其糧道及  
其到前遣奇兵先邀天渡柴壁左右嚴設伏兵備其表裏  
興欲進不得住又乏糧夫高者爲敵所棲深者爲敵所囚  
兵法所忌而興居之可不戰而取帝從其計興果敗歸明  
元即位問左右舊臣中誰爲先帝所親信新息公王洛兒  
曰有李先者爲先帝所知俄而召先讀韓子連珠論二十  
二篇太公兵法十一事詔有司曰先所知者皆軍國大事  
自今常宿於內賜先絹綵及御馬一匹拜安東將軍壽春  
侯賜隸戶二十二卒於內都大官年九十五詔賜金縷命

服一襲贈定州刺史中山公謚曰文懿子國襲爵國子鳳  
中書博士鳳子預字元凱太和初歷祕書令齊郡王友征  
西大將軍長史帶馮翊太守府解罷郡遂居長安羨古人  
殮玉法乃採訪監田躬往攻掘得若環璧雜器形者大小  
百餘頗有鹿麋黑者亦篋盛以還至而觀之皆光潤可玩預  
乃椎七十枚爲屑食之餘多惠人後預及聞者更求玉於  
故處皆無所見馮翊公源懷弟得其玉琢爲器佩皆鮮明  
可寶預服經年云有効驗而世事寢食皆不禁節又加好  
酒損志及疾篤謂妻子曰吾酒色不絕自致於死非藥過  
也然吾尸體必當有異勿速殯令後人知殮服之妙時七

月中旬長安毒熱預停屍四宿而體色不變其妻常氏以玉珠二枚含之口閉常謂曰君自云殮玉有神驗何不受含言訖齒啓納珠因噓其口都無穢氣舉斂於棺堅直不傾委死時有遺玉屑數升囊盛納諸棺中先少子皎天興中密問先曰子孫永爲魏臣將復事他姓邪先曰國家政化長遠不可紀極皎爲寇謙之弟子遂服氣絕粒數十年隱於恒山年九十餘顏如少童一旦沐浴冠帶家人異之俄而坐卒道士咸稱其得尸解仙道皎孫義徽太和中以儒學博通有少華補清河王懌府記室牋書表疏文不加點清典贍速當世稱之又爲懌撰輿地圖及顯忠錄性好

老莊甚嗤釋教靈太后臨朝屬有沙門惠憐以呪水飲人云能愈疾百姓奔湊日以千數義徽白憐稱其妖妄因令義徽草奏以諫太后納其言元又惡憐徙義徽都水使者俄而憐被害因棄官隱於大房山少子蘭以純孝著聞不受辟召孝昌中旌表門閭正光中文宣王亶嗣位思義徽雅正惇篤薦其孫景儒位至奉車都尉自皇始至齊受禪百五十歲先之所言有明徵焉景儒子昭徽博涉稽古脫略不羈時人稱其爲播郎因以字行於燕趙焉善談論有宏辯屬文任氣不拘常則志好隱逸慕葛洪之爲人尋師訪道不遠千里遇高尚則傾蓋如舊見庸識雖王公蔑如

初爲道士中年應詔舉爲高唐尉大業中將妻子隱於嵩山號黃冠子有文集十卷爲學者所稱

賈彝字彥倫本武威姑臧人也六世祖敷魏幽州刺史廣川都亭侯子孫因家焉父爲苻堅鉅鹿太守坐訕謗繫獄彝年十歲詣長安訟父獲申遠近歎之僉曰此子英英賈誼之後莫之與京弱冠爲慕容垂遼西王農記室參軍道武先聞其名常遣使者求彝於垂垂彌增敬重遣其太子寶來寇大敗於參合執彝及其從兄代郡太守潤等道武即位拜尚書左丞參預國政天賜末彝請詣溫陽療疾爲叛胡所掠送於姚興積數年述歸又爲赫連屈丐所執

拜祕書監卒太武平赫連昌子秀迎其尸柩葬於代南秀  
位中庶子賜爵陽都男本州大中正獻文即位進爵陽都  
子時丞相乙渾妻庶姓而求公主之號屢言於秀秀默然  
後因公事就第見渾渾夫妻同坐厲色曰爾管攝職事無  
所不從我請公主不應何意秀慷慨大言對曰公主之稱  
王姬之號尊寵之極非庶族所宜秀寧就死於今朝不取  
笑於後日渾左右莫不失色爲之振懼秀神色自若渾夫  
妻默然含忿他日乃書太監給事楊惠富臂作老奴官慳  
字令以示秀渾每欲伺隙陷之會渾伏誅遂免難時秀與  
中書令勃海高允俱以儒舊重於時皆選擬方岳以詢訪

被留各聽長子出爲郡秀固讓不受許之自始及終歷奉  
五帝雖不至大官常當機要廉清儉約不營資產年七十  
三遇疾詔給醫藥賜几杖時朝廷舉動及大事不決每遣  
尚書高平公李敷就第訪決卒贈冀州刺史武邑公諡曰  
簡子雋字異隣襲爵位荊州刺史依例降爵爲伯先是上  
洛置荊州後改爲洛州在重山人不知學雋表置學官在  
州五載清靖寡事爲吏人所安卒贈兖州刺史子叔休襲  
爵潤曾孫禎字叔願學涉經史居喪以孝聞太和中以中  
書博士副中書侍郎高聰使江左還以母老患輒在家定  
省坐免官後爲司徒諮議參軍通直散騎常侍加冠軍將

軍卒贈齊州刺史禎兄子景儁亦以學識知名爲京兆王  
愉府外兵參軍愉起逆於冀州將授其官不受死之贈河  
東太守諡曰貞景儁弟景輿清峻鯁正爲州主簿遂栖遲  
不仕後葛榮陷冀州稱疾不拜景輿每捫膝而言曰吾不  
負汝以不拜榮也

竇瑾字道瑜頓丘衛國人自云漢司空融之後也高祖成  
頓丘太守因家焉瑾少以文學知名自中書博士爲中書  
侍郎賜爵繁陽子參軍國謀屢有功進爵衛國侯轉四部  
尚書初定三秦人猶去就拜長安鎮將毗陵公在鎮八年  
甚著威惠徵爲殿中都官尚書太武親待之賞賜甚厚從



征蓋吳吳平留瑾鎮長安還京復為殿中都官典左右執法太武歎曰國之良輔毗陵公之謂矣出為冀州刺史清約冲素著稱當時還為內都大官興光初瑾女壻鬱林公司馬彌陀以選尚臨涇公主瑾教彌陀辭託有誹謗呪詛之言與彌陀同誅唯少子遵逃匿得免遵善楷篆北京諸碑及臺殿樓觀宮門題署多遵書位濮陽太守多所受納其子僧演姦通人婦為部人賈邈告坐免後以善書拜庫部令卒官

李訢字元盛小名真奴范陽人也曾祖產產子績二世知名於慕容氏父崇馮跋更部尚書石城太守車駕至和龍

崇率十餘郡歸降太武甚禮之呼曰李公爲北幽州刺史  
固安侯卒諡曰襄侯訢母賤爲諸兄所輕崇曰此子之生  
相者言貴吾每觀或未可知遂使入都爲中書學生太武  
幸中書學見而異之指謂從者曰此小兒終効用於朕之  
子孫因識晒之帝舅陽平王杜超有女將許貴戚帝曰李  
訢後必官達益人門戶可以妻之遂勸成婚南人李哲常  
言訢必當貴達杜超之死也帝親哭三日訢以超女壻得  
在喪位出入帝指謂左右曰觀此人舉動豈不異於衆也  
必爲朕家幹事臣訢聰敏機辯彊記明察初李靈爲文成  
博士詔崔浩選中書學生器業優者爲助教浩舉其弟子

箱子與盧度世李敷三人應之給事高讜子祐尚書段霸  
兒姪等以爲浩阿黨其親戚言於景穆以浩爲不平聞之  
於太武太武意在訢曰云何不取幽州刺史李崇老翁兒  
浩對曰前亦言訢合選但以其先行在外故不取之帝曰  
可待訢還箱子等罷之遂除中書助教博士入授文成經  
文成即位訢以舊恩親寵遷儀曹尚書領中祕書賜爵扶  
風公贈其母孫氏爲容城君帝顧羣臣曰朕始學之歲情  
未能專旣總萬機溫習靡暇是故儒道寔有闕焉豈惟予  
咎抑亦師傳之不勤所以爵賞仍隆蓋不遺舊也訢免冠  
拜謝出爲相州刺史爲政清簡百姓稱之訢上疏求於州

郡各立學官使士望之流衣冠之胄就而受業其經藝通  
明者上王府書奏獻文從之以訢政爲諸州之最加賜衣  
服自是遂有驕矜自得之志受納人財物商胡珍寶兵人  
告言尚書李敷與訢少長相好每左右之或有勸以奏聞  
敷不許獻文聞訢罪狀檻車徵訢拷劾抵罪敷兄弟將見  
踈斥有司諷以中旨嫌敷兄弟之意令訢告列敷等隱罪  
可得自全訢深所不欲且弗之知也乃謂其女壻裴攸曰  
吾與李敷族世雖遠情如一家在事既有此勸昨來引簪  
自刺以帶自絞而不能致絕且亦不知其事攸曰何爲爲  
他死敷兄弟事豐可知有馮闌者先爲敷殺其家切恨之

但呼闡弟問之足可知委訢從其言又趙郡范標具列數  
兄弟事狀有司以聞數坐得罪詔列訢貪冒應死以糾李  
敷兄弟故免百鞭髡刑配爲廝役訢之廢也平壽侯張黨  
見訢與語奇之謂人曰此佳士也終不久屈未幾而復爲  
太倉尚書攝南部事用范標陳策計令千里之外戶別轉  
運詣倉輸之使所在委滯停延歲月百姓競以貨賂各求  
在前於是遠近大爲困弊道路羣議曰畜聚斂之人未若  
盜臣訢弟左軍將軍璞謂訢曰范標善能降人以色假人  
以辭未聞德義之言但有世利之說聽其言也甘察其行  
也賊所謂諂諛匿貪冒姦佞不早絕之後悔無及訢不

從彌信之腹心事皆以告櫟訢既寵於獻文參決軍國大  
議兼典選舉權傾內外百寮莫不曲節以事之櫟以無功  
起家拜盧奴令獻文崩訢遷司空進爵范陽公出爲侍中  
鎮南大將軍開府儀同三司徐州刺史范櫟知文明太后  
之忿訢又知内外疾之太和元年希旨告訢外叛文明太  
后徵訢至京師言其叛狀訢曰無之引櫟證訢訢言爾妄  
云知我吾又何言雖然爾不顧余之厚德而忍爲此不仁  
甚矣櫟曰公德於櫟何若李敷之德於公公昔忍於敷櫟  
今敢不忍公乎訢慨然曰吾不用璞言自貽伊戚万悔於  
心何嗟及矣遂見誅璞字季直性惇厚多識人物賜爵宜

陽侯太常卿

韓延之字顯宗南陽堵陽人魏司徒暨之後也仕晉位建威將軍荊州從事轉平西府錄事參軍晉將劉裕伐司馬休之未至江陵密與延之書招之延之報書辭甚激厲曰劉裕足下海內之人誰不見足下此心而復欲欺誑國士其不屈如此事見南史宋本紀延之以裕父名翹字顯宗於是已字顯宗名子爲翹蓋示不臣劉氏也後奔姚興泰常二年與司馬文思等俱入魏明元以延之爲武牢鎮將賜爵曹陽侯初延之曾來徃栢谷塢省魯宗之墓有終焉之志因謂子孫云河洛三代所都朝廷必有居此者我死

不勞向北代葬也即可就此子從其言遂葬宗之墓次延  
之後五十餘年而孝文徙都其孫數家即居於祖墓之北  
栢谷塢

袁式字季祖陳郡陽夏人漢司徒滂之後父深晉侍中式  
在南歷武陵王遵諮議參軍及劉裕執權式歸姚興及姚  
泓滅歸魏為上客賜爵陽夏子與司徒崔浩一面便盡國  
士之交時朝儀典章悉出於浩浩以式博於故事每所草  
創恒顧訪之性長者雖羈旅飄泊而清貧守度不失士節  
時人甚敬重之皆呼曰袁諮議至延和二年衛大將軍樂  
安王範為雍州刺史詔式與中書侍郎高允俱為從事中



郎辭而獲免式沈靖樂道周覽書傳至於詁訓舍雅偏所  
留懷作字釋未就以太安二年卒贈豫州刺史諡肅侯子  
濟襲父爵位魏郡太守政有清稱加寧遠將軍及宋王劉  
昶開府召爲諮議參軍

毛脩之字敬文滎陽陽武人也世仕晉劉裕之平關中留  
子義真鎮長安以脩之爲司馬及義真敗脩之沒統万太  
武平赫連昌獲之使領吳兵以功拜吳兵將軍脩之能爲  
南人飲食手自煎調多所適意太武親待之累遷尚書賜  
爵南郡公常在太官主進御膳從討和龍時諸軍攻城行  
宮人少宋故將朱脩之爲雲中將軍欲率吳兵爲逆因入

和龍翼浮海南歸以告脩之不聽乃止是日無脩之大變  
幾作脩之遂奔馮弘脩之又以軍功遷特進撫軍大將軍  
位次崔浩下浩以其中國舊門雖不博洽猶涉獵書傳與  
共論說之次及陳壽三國志云有古良史風其所著述文  
義典正班史以來無及壽者脩之曰昔在蜀中聞長老言  
壽曾爲諸葛亮門下書佐得捷百下故其論武侯云應變  
非其所長浩乃與論曰承祚之評亮乃有故義過美之譽  
非挾恨之言夫亮之相備英雄奮發之時君臣相得魚水  
爲喻而不能與曹氏爭天下委棄荊州退入巴蜀守窮崎  
嶇之地僭號邊夷之間此策之下者可以趙他爲偶而以

管蕭之亞匹不亦過乎且亮既據蜀弗量勢力嚴威切法  
 控勒蜀人欲以邊夷之衆抗衡上國出兵隴右再攻岐山  
 一攻陳倉踈遲失會摧衄而反後入秦川更求野戰魏人  
 知其意以不戰屈之智窮勢盡發病而死由是言之豈合  
 古之善將見可知難乎脩之謂浩言爲然後卒於外都大  
 官諡恭公脩之在南有四子唯子法仁入魏文成初爲金  
 部尚書襲爵轉殿中尚書法仁言聲壯大至於軍旅田狩  
 唱呼處分振於山谷卒贈征東大將軍南郡王諡曰威朱  
 脩之者仕宋爲司徒從事中郎守滑臺爲安頡所禽太武  
 善其固守以宗室女妻之以爲雲中鎮將後奔馮弘弘送

之江南顏之剋滑宋陳留太守嚴稜戍倉垣及山陽公奚斤軍至稜川稜率文武五百人詣斤降明元嘉其誠款賜爵郃陽侯假荊州刺史隨駕南討還為上客及太武踐阼以歸化之功除中山太守有清廉稱卒於家子幼玉襲稜舊書有傳今附之云脩之在宋顯達事竝具南史

唐和字幼起晉西冥安人也父繇以涼土喪亂推涼武昭王霸于河右及涼亡和與兄契嵩其甥武昭王孫寶避難伊吾招集人衆二千餘家臣於蠕蠕蠕蠕以契為伊吾王經二十年和與契遣使降魏為蠕蠕所逼遂擁部至高昌蠕蠕遣部帥阿若討和至白力和先攻高寧契與阿若

戰沒和收餘衆奔前部國時沮渠安周屯橫截城和攻拔之斬安周兄子樹又剋高寧白力二城遣使表狀太武嘉之屢賜之璽書後和與前部王車伊洛破安周太武使周公方度歸討焉耆詔和與伊洛率所領赴度歸喻下柳驢以東六城因共擊波居羅城拔之後同征龜茲度歸令和鎮焉耆時柳驢戍王乙真伽將叛和徑入其城禽斬乙真伽由是西域剋平和有力焉正平元年和詣闕太武優寵之待以爲上客文成以和歸誠先朝封酒泉公太安中爲濟州刺史甚有稱績徵爲內都大官評決獄訟不加捶楚察疑獲實者甚多世以是稱之卒贈征西大將軍太常卿

酒泉王諡曰宣子欽字孟真位陝州刺史降爵爲侯卒子  
景宣襲爵卒於東都太守契子玄達性果毅有父風與叔  
父和歸闕俱爲上客封晉昌公獻文時位華州刺史太和  
十六年降爲侯子崇字繼祖襲爵

寇讚字奉國上谷人也因難徙馮翊万年父脩之字延期  
符取東萊太守讚弟謙有道術太武敬重之故追贈脩之  
安西將軍秦州刺史馮翊公賜命服諡曰哀公詔秦雍二  
州爲立碑墓又贈脩之母爲馮翊夫人及宗從追贈太守  
縣令侯子男者十六人其臨職者七郡五縣讚少以清絜  
知名身長八尺姿容嚴凝非禮不動符堅僕射韋華州里

高達雖年時有異恒以風味相待華爲馮翊太守召爲功曹後除襄邑令姚泓滅秦雍人千餘家推讚爲主歸魏拜河南郡太守其後秦雍人來奔河南滎陽河內者戶至萬數拜讚南雍州刺史軹縣侯於洛陽立雍之郡縣以撫之由是流人襁負自遠而至參倍於前進讚爵河南公加安南將軍領南蠻校尉仍刺史分洛豫二州之僑郡以益之雖位高爵重接待不倦初讚之未貴嘗從相者唐文相文曰君願上黑子入幘位當至方伯封公及其貴也文以百姓禮拜謁曰明公憶疇昔言乎延文坐曰往時卿言杜瓊不得官長人咸謂不然及瓊爲整屋令卿猶言相中不見

而瓊果以暴疾未拜而終昔魏舒見主人兒死自知己必至公吾怕以卿言瓊之驗亦復不息此望也乃賜文衣服良馬讚在州十七年甚收公私之吝年老求致仕卒遺令薄葬斂以時服太武悼惜之謚曰宣穆子元寶襲爵元寶弟臻字仙勝年十二遭父憂居喪以孝稱輕財好士獻文末爲中川太守時馮熙爲洛州刺史政號貪虐仙勝微能附之甚得其意後爲弘農太守坐受納爲御史所彈遂廢卒於家子祖訓順陽太守祖訓弟祖禮兄弟並孝友敦穆白首同居父母亡雖久猶於平生所處堂宇備設幃帳几杖以時節開堂列拜垂涕陳薦若宗廟焉吉凶之事必先



啓告遠出行反亦如之祖禮宣武末爲河州刺史在任數  
年遇郤鐵忽反又爲城人詣都列其貪狀十六條會赦免  
父之兼廷尉卿又兼尚書畏避勢家承顏候色不能有所  
執據後蠻反於三鵠爲都督追討戰歿贈衛大將軍七兵  
尚書雍州刺史昌平男祖禮弟儁

儁字祖儁性寬雅幼有識量好學彊記性又廉恕不以財  
利爲心家人曾賣物與人而利得絹一匹儁於後知之乃  
曰得財失行吾所不取訪主還之以選爲孝文帝挽郎除  
奉朝請大乘賊起燕趙擾亂儁參護軍事東討以功授負  
外散騎侍郎累遷司空府主簿時靈太后臨朝減食祿官

十分之一造永寧佛寺令雋典之資費巨万主吏不能欺  
隱寺成又極壯麗靈太后嘉之除左軍將軍孝昌中朝議  
以國用不足乃置監池都將秩比上郡前後居職者多有  
侵隱乃以雋爲之仍主簿永安初華州人史底與司徒楊  
椿訟田長史以椿勢貴皆言椿直欲以田給椿雋曰史底  
窮人楊公橫奪其地若欲損不足以給有餘見使雷同未  
敢聞命遂以地還史底孝莊帝後知之嘉雋守正不撓拜  
司馬其附椿者咸責焉二年出爲梁州刺史人俗荒獷多  
爲盜賊雋乃令郡縣爲立庠序勸其耕桑敦以禮讓數年  
之中風俗頓革梁遣其將曹琰之鎮魏興繼曰板築琰之

屢擾疆場邊人患之雋遣長史杜林道攻克其城并禽琰之琰之即梁大將景宗之季弟也於是梁人懼焉屬魏室多故州又僻遠梁人知無外援遂大兵頓魏興志圖攻取雋撫厲將士人思効命梁人知其得衆心也弗之敢逼雋在州清苦不事產業其子等竝徒步而還吏人送雋留連於道久之乃得出界大統三年東魏授雋洛州刺史雋因此乃謀歸闕五年將家及親屬四百口入關拜祕書監時軍國草創墳典散逸雋始選置令史抄集經籍四部羣書稍得周備加鎮東將軍封安西縣男十七年加散騎常侍遂稱篤疾不復朝覲恭帝三年賜姓若口引氏孝閔帝踐

祚進爵爲子武成元年進驃騎大將軍開府儀同三司雋  
年齒雖高而志識未衰教授子孫必先典禮明帝尚儒重  
德特欽賞之數加恩賜思與相見雋不得已乃入朝常與  
同席而坐顧訪洛陽故事雋身長八尺鬚鬢皓然容止端  
詳音韻清明帝與之談論不覺屢爲之前膝及雋辭還帝  
親執其手曰公年德俱尊朕所欽尚之言之事所望於公  
宜數相見以慰虛想以御輿令於帝前乘出顧謂左右曰  
如此事唯積善者可以致之何止見重於今亦將傳之萬  
古時人咸以爲榮卒年八十二武帝歎惜之贈本官加翼  
定瀛三州諸軍事翼州刺史諡曰元雋篤於仁義期功之

之中有孤幼者衣食豐約並與之同少爲司徒崔光所知  
光命其子勵與雋結友雋每造光常清談移日小宗伯盧  
辨以雋業行俱崇待以師友之禮每有閑暇輒詣雋譙語  
弥日恒謂人曰不見西安君煩憂不遣其爲通人所敬重  
如此子奉位至儀同大將軍順陽郡守洵州刺史昌國縣  
公奉弟顥少好學最知名居喪哀毀位儀同大將軍掌朝  
布憲爲典祀下大夫小納言濩澤郡公

酈範字世則范陽涿鹿人也祖紹慕容寶濮陽太守以郡  
迎降道武授兗州監軍父嵩天水太守範太武時給事東  
宮太武踐阼追錄先朝舊勲賜爵永寧男以奉禮郎奉遷

太武景穆神主於太廟進爵爲子爲征南大將軍慕容白  
曜司馬及定三齊範多進策白曜皆用其謀遂表爲青州  
刺史進爵爲侯加冠軍將軍還爲尚書右丞後除平東將  
軍青州刺史假范陽公範前解州還京也夜夢陰毛拂踝  
他日說之時齊人有占夢者史武進云公豪盛於齊下矣  
使君臨撫東秦道光海岱必當重牧全齊再祿營丘矣範  
笑答曰吾將爲卿必驗此夢果如言時鎮將元伊利表範  
與外賊交通孝文詔範曰鎮將伊利表卿造船市玉與外  
賊交通規陷卿罪窺觐州任有司推驗虛實自顯有罪者  
今伏其辜矣卿其明爲筭略勿復懷疑還朝卒京師謚曰

穆子道元

道元字善長初襲爵永寧侯例降為伯御史中尉李彪以道元執法清刻自太傅掾引為書侍御史彪為僕射李冲所奏道元以屬官坐免景明中為冀州鎮東府長史刺史于勁順皇后父也西討關中亦不至州道元行事三年為政嚴酷吏人畏之姦盜逃于他境後試守魯陽郡道元表立黷序崇勸學教詔曰魯陽本以蠻人不立大學今可聽之以成良守文翁之化道元在郡山亦蠻伏其威名不敢為寇延昌中為東荊州刺史威猛為政如在冀州蠻人詣闕訟其刻峻請前刺史寇祖禮及以遣戍兵七十人送道元

還京一人竝坐免官後為河南尹明帝以沃野懷朔薄骨  
律武川撫冥柔玄懷荒禦夷諸鎮竝改為州其郡縣戍名  
令準古城邑詔道元持節兼黃門侍郎馳駟與大都督李  
崇等宜等立裁減法留會諸鎮叛不果而還孝昌初梁遣  
將楊州刺史元法僧又於彭城反叛詔道元持節兼侍中  
攝行臺尚書節度諸軍依僕射李平故事軍至渦陽敗退  
道元追討多有斬獲後除御史中尉道元素有嚴猛之稱  
權豪始頗憚之而不能有所糾正聲望更損司州牧汝南  
王悅嬖近左右立念常與卧起及選州官多由於念念常  
匿悅第時還其家道元密訪知收念付獄悅啓靈太后請



全念身有敕赦之道元遂盡其命因以劾悅時雍州刺史  
蕭寶夤反狀稍露侍中城陽王徽素忌道元因諷朝廷遣  
爲閩右大使寶夤慮道元圖已遣其行臺郎中郭子帙圍  
道元於陰盤驛亭亭在岡上常食岡下之井旣被圍穿井  
十餘丈不得水水盡力屈賊遂踰墻而入道元與其弟道  
闕二子俱被害道元瞋目叱賊厲聲而死寶夤猶遣斂其  
父子殯於長安城東事平喪還贈吏部尚書翼州刺史安  
定縣男道元好學歷覽奇書撰注水經四十卷本志十三  
篇又爲七聘及諸文皆行於世然兄弟不能篤睦又多嫌  
忌時論薄之子孝友襲道元第四弟道慎字善季涉歷吏

傳有幹局位正平太守有能名遷長樂相卒贈平州刺史  
道慎弟道約字善禮樸質遲鈍頗愛琴書性多造請好以  
榮利干謁乞丐不已多爲人所笑弄坎壈於世不免飢寒  
晚歷東萊魯陽二郡太守爲政清靜吏人安之範弟道峻  
子惲字幼和好學有文才尤長吏幹舉秀才射策高第歷  
位尚書外兵郎行臺長孫承業引爲行臺郎惲頗兼武用  
恒以功名自許每進計於承業多見納用以功賞魏昌縣  
子惲在軍啓求減身官爵爲父請贈詔授征虜將軍安州  
刺史惲後與唐州刺史崔元珍固守平陽介朱榮稱兵赴  
闕惲與元珍不從爲榮行臺郎中樊子鵠陷城被害所作

文章頗行於世撰慕容氏書不成子懷則司空長流參軍  
韓秀字白武昌黎人也祖宰慕容儁謁者僕射父景皇始  
初歸魏拜宣威將軍騎都尉秀歷位尚書郎賜爵遂昌子  
文成稱秀聰敏清辯才任喉舌遂命出納王言并掌機密  
行幸遊獵隨侍左右獻文即位轉給事中參征南慕容白  
曜軍事延興中尚書奏以敦煌一鎮介遠西北寇賊路衝  
慮或不固欲移就涼州羣臣會議僉以爲然秀獨曰此蹙  
國之事非關土之宜愚謂敦煌之立其來已久雖隣彊寇  
而兵人素習循常置戍足以自全若徙就姑臧慮人懷異  
意或貪留重遷情不願徙脫引寇內侵深爲國患且捨遠

就近遙防有闕一旦廢罷是啓戎心則夷狄交構互相來往關右荒擾烽警不息邊役煩興艱難方甚乃從秀議後爲平東將軍青州刺史卒子務襲爵務字道世性端謹有更幹爲定州平北長史頗有受納爲御史中尉李平所劾付廷尉會赦免後除龍驤將軍郢州刺史務獻七寶牀象牙席詔曰昔晉武帝焚雉頭裘朕常嘉之今務所獻亦此之流也奇麗之物有乖風素可付其家人後以詐表破賊免官久之拜太中大夫進號左將軍卒

堯暄字辟邪上黨長子人也本名鍾葵後賜名暄祖僧賴道武平中山與趙郡呂含首來歸國暄聰了美容貌爲千

人軍將太武以其恭謹擢爲中散後兼北部尚書于時始立三長暄爲東道十三州使更比戶籍賜獨車一乘廐馬四匹暄前後從征及出使檢案三十許度皆有剋己奉公之稱賞賜衣服綵絹奴婢等物賜爵平陽伯及改置百官授太僕卿轉大司農卒於平城孝文爲之舉哀贈相州刺史初暄至徐州見州城樓觀嫌其華盛乃令往往毀徹由是後更損落及孝文幸彭城聞之曰暄猶可追斬暄長子洪襲爵洪子傑字永壽元象中開府儀同三司樂城縣公洪弟遵位臨洮太守卒謚曰思遵弟榮位員外散騎侍郎子雄字休武少驍果輕財重氣位燕州刺史平城縣伯隨

尔朱兆與齊神武戰敗於廣阿率所部據定州歸神武其  
從兄傑爲北滄州刺史亦遣使降神武以其兄弟俱有誠  
款使傑便爲行瀛州事使雄代傑爲瀛州刺史進爵爲公  
時禁網踈闊官司相與聚斂唯雄義然後取接下以恩甚  
爲吏人所懷魏孝武帝入關雄爲大都督隨高昂破賀拔  
勝於穰城仍除豫州刺史元洪威據潁川叛叛人趙繼宗  
殺潁川太守邵招據樂口北應洪威雄討之繼宗敗走城  
內因雄之出據州引西魏雄復興行臺侯景討平之梁將  
李洪芝王當伯襲破平鄉城雄竝禽之又破梁司州刺史  
陳慶之復圍南荊州東救未至雄陷其城梁以元慶和爲

魏王侵擾南境雄大破之於南頓尋與行臺侯景破梁楚  
城豫州人上書更乞雄爲刺史復行豫州事潁州長史賀  
若統執刺史田迅據州降西魏詔雄與廣州刺史趙育揚  
州刺史是寶隨行臺任祥攻之西魏將怡鋒敗祥等育寶  
各還據城降敵雄收散卒保大梁周文帝遣其右丞韋孝  
寬等攻豫州雄都督程多寶降之執刺史馮邕并雄家屬  
及部下妻子數千口欲送長安至樂口雄外兵參軍王恒  
伽都督赫連雋等從大梁邀之斬多寶收雄家口還大梁  
雄別破樂口禽丞伯進討縣瓠復以雄行豫州事西魏以  
是寶爲揚州刺史據項城義州刺史韓顯據南頓雄一日

拔其二城禽顯及長史岳寶遁走加驃騎大將軍儀同三司仍隨侯景平曾陽復除豫州刺史雄雖武將性質寬厚爲政舉其大綱而已在邊十年屢有功績愛人物多所施與亦以此稱興和四年卒於鄴贈司徒諡曰武恭子師嗣柳崇字僧生河東解人也七世祖軌晉廷尉卿崇方雅有器量身長八尺美鬚明目兼有學行舉秀才射策高第解褐太尉主簿轉尚書右外兵郎中于時河東河北二郡爭境其間有鹽池之饒虞坂之便守宰百姓皆恐外割公私朋競紛囂臺府孝文乃遣崇檢斷上下息訟屬荆郢新附南寇窺擾又詔崇持節與州郡經略加慰喻還遷太子洗



馬本郡中正累遷河中大守崇初屈郡郡人張明失馬疑  
執十餘人崇見之不問賊事人別借以溫顏更問其親老  
存不農業多少而微察其辭色即獲真賊呂穆等二人餘  
皆放遣郡中畏服境內帖然卒於官贈岐州刺史謚曰穆  
崇所製文章冠亂遺失長子慶和性沈靜不競於時位給  
事中本郡中正卒慶和弟楷字士則身長八尺善草書頗  
涉文史位撫軍司馬

論曰屈遵學藝知機恒乃局量受委張蒲谷渾文武爲用  
人世仍顯不亦善事公孫表初則一介見知終以輕薄致  
戾軌始受探金之賞末陷財利之嫌鮮克有終固不虛也

張濟使於四方有延譽之美李先學術嘉謀荷遇三世賈  
彝早播時譽秀則不畏彊禦實瑾李訢時曰良幹瑾以片  
言疑似訢以夙故猜嫌而嬰合門之戮良可悲也韓延之  
忠於所事有國士之列表式取遇崔公以博雅而重脩之  
晚著誠款唐和万里慕義寇讚誠信見嘉艷範智器而達  
道元遭命有銜鬚之風韓秀議邊得馭遠之竿堯暄聰察  
致位禮加存沒柳崇素業有資器行仍世盛矣乎

列傳第十五

北史二十七

方洽周益周之冕孫粹然校正